

**Maki Naña Pa Ke Pan**  
**LE YU LALA**  
**Naña Amlelaga**  
**Visayuena Na Tusi Nene**

*Suniena plas na tusi nini*

Yaru naña siri maki nini, naga siri pano pa pegas tai kiena li nalelagaena lala naña asuña añal ke pog m̄arera lala e kiela maliena, komin yaru la naña pe amlelaga re poli asuña akawela ke amio la. Pelaga naña yaru la akawela manene amio la sanene, kila sane añal m̄arera, a lavis aligan kiela lelagaena e Yesu Kristo. Ana yaru nene pisa panila sape monar asuñalu m̄arera e kiela lelagaena lala. Naga pisa panila sape Yesu Kristo ga pe yaru wo naña pisa meraravan Ntewa pan ita. Ana na visa meraravanen suri nene, naga pisayu suri telu.

Suri na sumo, naga pisayu sape Yesu naga pe narina Ntewa kemua lelaga naña suña vano vano tařatete řisi pogos tai. Pe lelaga naña naga pe narina Ntewa rui, ana naga m̄ena suña řikeyon kinasinen řelaga nene na logearen Ntewa, e sur la naña kila naga mloge piowa e tasnena. Ana komin naña naga pe narina Ntewa, naga mon la metavan navisawalena lala, pona navisi lala, pona Mosis m̄enaga.

Suri na lua, Ntewa pisawal rui sape Yesu, naga pe řarin yaru wa naña naga mon manene metava naña suña vano vano tařatete řisi pogos

tai. Naga pe þarin yaru wa naþa taulu make þarin yaru wa na sumo lala.

A suri na telu, e yuþaena kiena Yesu naþa naga pe þarin yaru wa na mon manene metava, naga maren natamaliaen yeririna makega, þarplan kiela milamulena viowa lala, kila la pe amarau re si poli, a mla malena naþa ve uro re panila. Na kuþaþaena nasumo lala, la ape totou na kuþaþaena ga naþa Yesu Kristo kila.

E marana na keviu lualima taaga pa taaga, yaru naþa siri maki nini naga pisayu yaru laþasa e Tusi Marua naþa amlelaga mārera e Ntewa. A naga pisa pa la naþa naga siri maki nini panila, sape popon ataveve malena kiena la nene, vena akilia asuþalu mārera silaga, vano vano-o tol luwasnen kiela maliena. A silaga, monar akira avisu Yesu, vena akilia ava awarpoyo e pog mārera lala, naþa asuþa atol ke e yaru la naþa asuþa akila ke mārera panila paþisi. A na kilamakeen kiena visena, naga pis ruru pan kiena yaru lala, pisa panila sape monar avisuar ruru kiela maliena lala.

*Komþasnen tusi la na nini*

Visena þesa. Kristo kila meraravan Ntewa panita 1:1-3

Kristo naga mon laa metavan navisi lala 1:4—2:18

Kristo naga mon laa metavan Mosis amio Yosua 3:1—4:13

Kristo naga mo laa metavan þarin yaru wa lala 4:14—7:28

Naviranarena viu naga mon laa metavan naviranarena marua 8:1—9:28

Kuṣaṣaena naṣa Kristo kila naga mon laa metavan kuṣaṣaena marua lala 10:1-31  
 Pelaga na lelagaena naga po paṣisi 11:1—12:29  
 Visena la naṣa kila yaru la asuṃalu ṃarera, a visena maro 13:1-25

*Yesu na mon la metavan li navisawalena lala*

<sup>1</sup> Kiau erau le Yu lala, nakonua konua la rui Ntewa pisawal kiena visena yam mokliu pa kieta yermarua lala, e mrapa la moki a e ṗelaga wo la naṣa peve taṣena, pimi molue kome kiena navisawalena lala.

<sup>2</sup> Ana nanagane, e legiena maro la naṣa tesike e ne, naga pis mesmes nena pan ita pimi kome Narina Yesu. Narina ne nane nanua sumo, e nasien yomarava, Ntewa miyumuṃae kome naga, lalua amliganar make pog a yo lala, a siraunia, Ntewa pisirlua Narina nena, mligan sur punu ga sike e limana, naga pe ṗarun la.

<sup>3</sup> Narina nene, naurarena kiena ne Ntewa tego e kiena malena, sane kus nena marana ne Ntewa veraga, pe totou na ṗelaga kiena ne Ntewa. A naṃareraena na kiena visena ṃarera paṣisi, naga ga ṗuarar sur make ga na yomarava nini, a yo taṣena ṃena lala su ruru suṃa ga. A naga ke narui naga taṃan naga pimi kilavan make kieta mlamulen viowa lala, a pogos naṣa kila make ruru kiena yuṃaena nene e yomarava nini, ṗasuṗe si pa ma e peni, pa to metava e lepas nen Arimana na ṗamarua, Parin Suṗe nae ma e peni.

*Yesu na mon la metavan navisi lala*

<sup>4</sup> Yesu totano e nene sanene, naga mon manene la metavan navisi la naña asike ne, komin kia naña naga þaria vanon kiena yumnaena, po manene la taulu kiela kia.

<sup>5</sup> Visae tevisu e Siriena Wa lala, visena moki naña sike ea naña asape Ntewa kila Narina mon manene la metavan navisi lala. E visena la ta nene, Ntewa pis pa kiena Navisaarena nena, sape

*“Ko na, nepisu sane þane opim ope naruu nenaga,  
a nepim nepe Arimoña kemua lelaga.”*  
*Yauena 2:7*

A ta sina pisa mēna sanini, sape

*“Yoko in na neim neve Arimana, a yoko naga ve naruu.”* *Sam2 7:14*

Visena lua nene, Ntewa pe pisa re nena pa kiena navisi la ta poli, sape pe Narina Wa, ana pisa ga pa Yesu.

<sup>6</sup> A visen si tai, pisayu pogos naña Ntewa sinenan sape ligan narina mēaru nene imi e yomarava, ana pisape

*“Popon navisi make ga alotunia.”* *Naw 32:43*

<sup>7</sup> E lepas kiena ne navisi lala, la akila yumnaena wo la mokliu, ana Visena Wa pisayu la, sape

*“Navisi kiena ne Ntewa lala aþar kiena visena, asa ga lagi, amiyumnae kiena ne Ntewa, asa ga kapi.”* *Yauena 104:4*

<sup>8</sup> Ana pogos naña Visena Wa pisayu Narina ne Ntewa, sape naga mon manene la metavan navisi lala, pisayua sane naga maran taaga sa ke Ntewa, pio naga Ntewa. Pisayu naga, sape

*“O Ntewa, kioṃa lele wa na totanoena naga mon lue ga na ṃeke ne. Plaki na kioṃa nasuṓpenena, naga ṓelaga wo ke narui.*

*9 Ko okekaran manene la ṓelaga naṓa po, ana yepmavin visuen ṓelaga viowa, ana kioṃa Ntewa na mava naga mligan ko opa metava, opa manene la metava otaulu kioṃa erau lala, kila ko okekara keviu sa naṓa miyowauia ruru ko e ponotaninu wo tai.”* *Yauena 45:6-7*

*10 A e visen si tai, tepisu naṓa Ntewa na mava pio Narina sape Suṓe, a pisayu pupia sur kerkeviu la naṓa naga sii la, sape*

*“Suṓe, ko ke narui ko opisirlua purṓes nen yomarava, lumoṃa ga miyuṃaen sinapane ma metava.*

*11 Ana sur la nene, yoko amenunu makea, akokovio, ana yoko ko na osike osike lue.*

*12 Sane takue marua tai, yoko osulowar la owar plan la nenaga, a sane moṃa kulsota marua tai, yoko oyenlua nenaga, ana yoko ko na ove urviu maran ve taaga silaga, a kioṃa kas la taṓatete ṓisi pogos tai.”* *Yauena 102:25-27*

*13 A visen kiena ne Ntewa taṓena si sike ga wa, naṓa pe pisali re pa navisi tai poli wa, ana pisa ga pa Narina naga taaga, sape*

*“Ototano e lepasneu na ṓamarua, oṓoṃa sanene, vano-o yoko neligan kioṃa nasinekar lala aim ave takue na vilanvanen laṃa ea.”* *Yauena 110:1*

*14 Nane visena maro e lepas nene narui, naṓa pisayu sanape naṓa navisi kiena ne Ntewa lala la na amiyuṃae kiena ga, la ape ninuna na*

waren kiena visena, a ape naiila itaena vena tetol natamaliaena, ana yaru tai sike ga wa naga mon metavan la make ga, nane Narina Wa ne nane Yesu, naña Ntewa pis maro pan ita ea.

## 2

*Nalologena wo viu kiena ne Yesu mon la metavan navisaluaena marua kiena Mosis*

<sup>1</sup> Sanene, visena wo lelaga nalologena wo la naña temloge pa narui, monar tesitom urmi manene e la, monar touarar ruru mñarera. Visae peraga, tevisuaria sañisi korur yan plan ita si vetania.

<sup>2</sup> E lepas nen navisaluaena marua nasumo lala, navisi ga la añar pimi, ana kana visena ne lala amesmes ga, a amñarera pañisi. Ana na kilaroen kana visena make ga, a kana nalogeluen make ga, kana nakoena ruru napo sike pa rui.

<sup>3</sup> Ana nanagane, nalologena wo viu pimi tol ita pa rui, a naga keviu taulu manene navisaluaena marua nasumo. Sanene, visae tesitom korenan mrapa na kieta natamaliaena naña sike ea, yoko tařatete nena toure vetan kana nakoena nena- a pñisa. Kieta Suře ke narui naga kila řesan lologena wo pimi mñalivi, a la naña amloge pisawal e kiligala, la apisawal liluen pimi pan ita, akila merarava van ita apisape lelaga.

<sup>4</sup> A Ntewa mña miila naga e visena nene, naña naga kila kile lala, a sur nailanen lala, a yuñaena lala na kiena namñareraena, a metavana, naga kiakian plan nalaena lala kiena ne Ninuna Wa pan ita ai naña naga sitom sape la vania. Ana tepisu sur la nene, tekilia tesape lologena

wo kiena ne Yesu Kristo naga pe visena tai naña naga po manenea taulu kieta navisaluaena marua ita le Yu lala.

*Yesu ve Suře e yomarava naña yoko imi na wa*

<sup>5</sup> Tekilia tesape Yesu naga mon la metavan navisi lala, komin naña e lepas na yomarava naña pimi ke ne, yoko Ntewa tařatete ligan navisi la ave suřenia, ana mligan sike vatanon Narina.

<sup>6</sup> Sur nene Tus Marua mēna pisa, e visen tai kiena ne Parin Suře Tepet naña pisa pa Ntewa, sape

*“?Sur wo ya na sike e yaru, naña kila ositom manene naga sanene?*

*?Pona ya ne kila ořalivi ke e narina ne yeririna?*

<sup>7</sup> *Nanua, omligan naga sike tanon navisi lala, ana nanene na yam plas la ga,*

*a nanagane, opisirlua si naga rui. Omligan naga metava e yo wo tai amio kana pupia naurarena a nawarwarena nena,*

<sup>8</sup> *ana omligan sur make ga sike vatanon kiena namareraena.”*

*Yauena 8:4-6*

Ana pogos naña Ntewa kila yaru ve řarun sur make ga, kila sane pe sur re nena tai naña naga pe pe suřen re poli. Naga kila sane sape ve sanene, ana pimi tol nanagane, pe tepisu make re sur la e yomarava nini poli wa e kilamarata pa mapin sa naña Ntewa sinenania.

<sup>9</sup> Sur la pere wa, ana silaga tekira tepisu ga Yesu, naña Ntewa pisirlua naga pa mon manene la metava. Nanua sumo Ntewa sinen miye ita pařisi, ana kila Yesu pito tano yam plas la ga, kila naga patanon navisi lala, a kila naga řar manene

pupia naloge viowaena na namarewoitaena, ana siraunia, pisirlua sina, paia ruruia amio nau-rarena nae peni.

*Yesu pe kieta natamaliaena, pe kieta ãarin yar wa*

<sup>10</sup> Pelaga na yumãena kiena ne Ntewa na tamaliaitaena nene naga mesmesu, komin naga sii sur make ga, a sur make ga pe naga kiena, ana sinenan sape taulu maran si pupia ãegas nen narina la tai vetan yomarava nini, aim si ave kiena. Naga sinenan sape kila sanene, ana nakilaena na ñarera pañisi, ana ñal mrapa taaga ga nakilaena, naga sanini: mrapa naloge viowaena kiena ne Yesu, naña Ntewa kila ga naga pimi pe yeririna, naga pe yar natepoen yomãrua vena taulu kieta natamaliaena.

<sup>11</sup> Yesu kilia sumon ita sanene komin naga ke narui naña kila ita temekiki, kila narui naga kekaran naña pisu ita sane tepe mratava taaga ga temio.

<sup>12</sup> Visena telu e lepas nene apisa sanini. Tai sike e tus kiena ne Yauena lala, sane Yesu pis pa Ntewa, sape

*“Yoko nevisawal ruru kioña kia va wolai lala, yoko neieluar ko likan yeririna lala.”*

*Yauena 22:22*

<sup>13</sup> Ta sina, pisawal naña Yesu mlelaga e Ntewa sa ke naña temlelaga e naga, visena naña sike e tus kiena ne Navisawalena Aisea, sape

*“In ke narui, naña kiau nawasineena, nemligan sike e naga.”*

*Ais 8:17*

Namaro, visena si tai kiena ne Aisea, pisayu Yesu amio wenla lala, sape



*“Nane in ke nane nesike nini narui, nemio narina  
ne Ntewa taņena lala naņa naga mligan la  
e lumãau.”* *Ais 8:18*

<sup>14</sup> Ana ita narina ne Ntewa la nini, ita make ga tepe yeririna, temio tasneta a kata kuruta, ana naņa Yesu imi ve wenla kemua lelaga e ita, naga pimi e yomarava nini, naga tasnena a kana kuruta sa ke ga ita. Sanene, pogos naņa taņan si naga mare wo ita, ana kiena marena nene mľelua puryukawaena kiena ne p̄arin suņe na m̄areraena na marena, nane Yermare.

<sup>15</sup> Naga mľelua m̄areraena kiena ne Yermare, mluņar plan kilika lala naņa aņanaria kararkare ruru ita nenaga, sane maraunen marena naņa temloge viowaganian e kieta malena wetelu.

<sup>16</sup> Lelaga naņane, yuņaena wo na iilaena kiena ne Yesu, pe kila re pa navisi nae ma e peni la poli, ana kila ke ga pan ita na yomarava nini. Visena la mokliu apisa visena sanini, asape

*“Naga suņa miila ruru ke lus kiena ne yermarua  
Epraam lala.”* *Ais 41:8-9*

<sup>17</sup> Nane sitomena kiena ne Ntewa sanene. Naga pisu sane Yesu monar imi sane ita wenla lala e sur make ga, vano-o kilia kilia ruru ita, kilia sinen ye ita. Ana tekilia towasinea, sa naņa yoko naga masisun yuņaena naņa yoko naga kila va Ntewa komin kieta mlamulen viowa lala, naņa kila kieta marawo temio Ntewa, sane pe kieta Parin Yar Wa.

<sup>18</sup> Naga pisu pupia nakilaliena pimi mľalivin kiena malena, mloge piowagan pano-o tauluia, ana kila naga kilia iila ruru ita sina e pogos naņa nakilaliena imi m̄arera m̄ena ga van ita.

### 3

#### *Yesu mon la metavan yermarua Mosis*

<sup>1</sup> Wolai a vineu wa lala, naña amlogear navioena nae peni rui, nepisa pan amiu rui nesape Yesu kilia iila ruru ita, ana nenagane nomãareran amiu, sineun nesape popon asitomyu manene naga va laa sane wa, sane naga pe nalologena a naga pe ãarin yar wa na kieta nalelagaena.

<sup>2</sup> Tevisu veve ruru li Yesu amio yermarua Mosis nanua. Yermarua Mosis nanua sumo, naga masisun kiena yumãena la pañisi e mratava mña ne Ntewa, a Yesu mña masisun yumãena la pañisi naña Ntewa pisirlua naga sape naga yumãenia.

<sup>3</sup> La ga luwoka amasisun yumãena, ana Ntewa pisirlua Yesu pa manene la metavan Mosis, komin naña sane Mosis naga sike ga loyuma mña ne Ntewa, kila ke kana narin yumãena ne lala, ana pupia yumãena na visirluaen yuma nena, Yesu ga kila.

<sup>4</sup> Yuma make ga, monar yar tai naña yumãenia, ana Yesu ke narui naga miyumaen yuma mña Ntewa, ana Ntewa naga pe ãarun yumãena nene.

<sup>5</sup> Sanene, Mosis naga pe yar na yumãena, masisun ruru kiena yumãena make ga loyuma e mratava mña Ntewa, pano tol naña naga pe yar na visawalen pupia visen kiena ne Ntewa lala naña apisawal liluen ke pimi tol nanagane,

<sup>6</sup> ana Kristo naga kila pa manene la sane, komin naga masisun visuaren pupia yumãena

make ga na yuñã nene, sane naga pe m̃earu na pupia kana ãar nena.

?A yuñã nene na pisa ke ya ne, pona pisa ke ai? Suñã pisa ita ke ga ne, komin visae ve temarau re, a visae tekekaran kiena navisaaren lala, touarar ruru kieta nawasineena e la, ita teve kiena namratava wa ruru nena lala.

*Yesu mon la metavan Mosis, a monar telelaga manene va la sane taulu la naãa Mosis sumon la*

<sup>7</sup> Visena ta teke e Siriena Wa, naãa pe visena kiena ne Ninuna Wa na kilaãege itaena, naãa pisa sanini, sape

*“Pane, visae aloge pulgon Ntewa,*

<sup>8</sup> *pe pon re si kiamiu sitomena la imi si m̃arera poli, sa naãa kiamiu yermarua la akila rui.*

*Nanua sumo, e yomema, asike e pog na kilalien tai paãisi, asuñã pano-o asuñal ke sina ga akila ãarila.*

<sup>9</sup> *Ana Ntewa pisu la, pisa sanini, sape*

*Nayalena kena la nene naãa tol kas lualima yam vari ne, nesike nemio la silaga, apisu kiau naiilaena wo la pan la, ana ãelaga kien la nene na kilali in paãisi.*

<sup>10</sup> *Kiela ãarm̃arera kila sineu pikirara paãisi, ana nepisu sane peraga, la nene na, silaga asuñã apa e nene apa e nene amiyepe ke petan kiau mrapa mesmes lala.*

<sup>11</sup> *Sineu maren la ne sanene narui, sineu kar la paãisi, ana nesuñalu narui, nepisaar pan la nesape purvanua wo navaruruena naãa nekila ruru suñate la nesape ve kiela, yoko ve ava re si loyuñã ea.” Yauena 95:7-11*

<sup>12</sup> Wolai a vineu lala, komin sur ne la nanene, popon kam na avisuar ruru amiu. Pe pon re visae amiu yar tai, sitomen viowa sike e naga, pona sinena ve lelaga re si narui, kila naña naga werelua si naga vetan malena wo kiena ne Ntewa mali.

<sup>13</sup> Pe sinetan re ita yar tai loru sanene poli, ana monar tela visena naiilaaren van ita silaga e legiena punu ga, vena ve ita yar re tai naña ðelaga na mlamulen viowa la visa kotalia kare re naga vano-o naga manin nenaga. Visena naña meta ne sape “Pane, visae aloge pulgon Ntewa,” ana naga pe visena nasumo tai, ana sumal sumã ga, pulgona pio ke na wa, tesike e kana legiena na logearen la na wa.

<sup>14</sup> Popon touarar kieta lelagaena m̃arera ve sa nena ga naña temlelaga ðesan ea, popon tesumal m̃arera tesumã vano-o tol luasa. Ana visae tekila ve sanene, yoko temio Kristo, teve yar na war viraviranan naurarena wo lala kiena ne Ntewa.

<sup>15</sup> Lelaga nañane-e, Visena Wa naña metava pisa sanene, sape pe pon re si sinemiu la im m̃arera poli, sa naña yermarua lala akila e pogos na kilaliena lala e yomema, naña asumalu akawe visena kiena Mosis.

<sup>16</sup> ?Ana la ne akila ðar m̃arera sanene, a la nene? La naña akila sanene, la naña akekanan amlogear ðesan pulgona Ntewa, ðis narui apatanon kiela yar keviu yerkaawa Mosis, naga sumon la apetan Isip. Naga sumon la amolue petan yo nene ana pe yam piavi re poli, akawe ke sina naga.

<sup>17</sup> ?A la naña akilali Ntewa, amiyuyur sinena

e kas lualima yam vari nene e kiela nayalorena, pano-o sinen kar manene la la, la ke nene na wa? Ee, la naña akila sanene, la ke ga nene na wa, naña naga tamalia la, ana siraunia akila luen ga mlamulena piowa e marana, pano naga kila amarmare ga, puryula la sutetai kar ga sike e yomema.

<sup>18</sup> ?A la naña naga pisaar sape yoko la tařtatete ava loyuña e kiena purvanua wo tanea navaruruena naña kila ruru sape ve kiela, la ape yeririna la ne sanape? La naña tařtatete ava ea, naga la naña akilakila ke řarila, naña pe amlogear re sur ta poli.

<sup>19</sup> ?A ya ne kila narui tařtatete ava loyuña e yo wo na varuruena nene? Tařtatete avavini vanon pe amlelaga re e Ntewa poli, a pe ařsine re naga poli.

## 4

### *Navaruruena wa kiena ne yeririna lala kiena ne Ntewa*

<sup>1</sup> Nanua sumo, Ntewa kila ruru tanea yo na varuruena tai kiena ne kieta yermarua lala, ana nanagane mēna ga kila ruru si kieta yo wo na varuruen rui. Nasiiena tere nene naga mal ruru ga sike na wa, ana pe pon re teve sa yermarua la nene poli, naña akilalu kiela navaruruena nene, la moki naña pe apa re loyuña e poli. Peraga, popon ita tevisu ruru ita yo, pe pon re naña vano-o řisi na ita lařasa, la mēna akilalu kiela pulmas, Ntewa visu veve ruru la sa řisi ve ava atol re kiela navaruruena.

<sup>2</sup> Naga nene komin naña ita maran taaga ga sane yermarua la nene, naña lologena wo kiena ne Ntewa tol ita, sa naña tol la, ana akila sa naña amloge, ana pe amla re si lelagaena to metavan poli. Pe amla ruru re si kana visena la nene e kiela malena la poli, p̄isi pe p̄ar re mras e la poli.

<sup>3</sup> Ana e lepas kiena ne la nini naña pe amlelaga re sanene poli, Ntewa pis m̄arera rui, pisa visena naña nesiri metava yam tai rui. Visena nene, pisape

*“La nene akila sineu kar la pañisi,*

*ana nepisaar nesape yoko la tañatete akilia atol kiau navaruruena nene.”* *Yauena 95:11*

Ana ita naña temlelaga kemua e lelaga, navaruruena nene naga pe kieta naña teva loyuma ea.

Navaruruena kiena ne Ntewa nene, naga kila ruru pe kieta su nakonua rui, komin e pogos nasiiena, naga miyumaen pano-o tol kana legiena orai ana p̄isi nena ga,

<sup>4</sup> ana sa naña Visena Wa pisa e yo lañasa, sape e kana legiena olua, naga pa ruru e kiena yumaena ne lala, pe miyumaen re si sur la nene poli.

<sup>5</sup> Ana sur si tai, visena na metava pisayu naña Ntewa pisape yoko yar lañasa tañatete nena atol kiena navaruruena,

<sup>6</sup> ana visena nene kila meraravan sape sane monar yar si lañas asike koyo tai naña yoko Ntewa tam̄an la ava loyuma. La nanua sumo, amloge lologena wo kiena ne Ntewa amio purvanua wo naña pisaar pisape ve kiela, ana pe

asumñal re mñarera poli, pe amlogear re poli, ana akila pal ruru nena ga, pe apa re loyumña e poli.

<sup>7</sup> Ana kieta navaruruena sike na wa sike ne, a Ntewa pisaar kana legiena na tolana, komin kas mok p̄aro rui, Parin Supe Tepet pisawal visena la naña sike meta rui, naña pisa sanini sape

*“Nanagane visae aloge pulgona, pe pon re kiamiu sitomena la imi mñarera si poli.”* *Yauena 95:7,8*

Popon tevisu kilale sane “nanagane” naña pisa e nini, nane kieta pogos ne nanini narui, naña Ntewa kila ruruia vena tetol natamaliaena.

<sup>8</sup> Asitomyuli yermarua Yosua nanua. Naga sumon kieta yermarua la kompasa apa loyumña e purvanua wo naña Ntewa pisaaria, ana visae naga ke narui navaruruena kiena ne Ntewa naña akus rui, yoko Ntewa tañatete si visayu pogos tañena tai va Tepet, visave pe legiena na vaen loyumña e kiena navaruruena.

<sup>9</sup> Ana peraga, naga sumña pisa ke pisape navaruruena wa nowo tai sike ga wa kiena ne kiena yeririna lala,

<sup>10</sup> ana visae a naña va loyumña ea, yoko wo naña wo vana vañisi, yoko naga kilia va ruru e kiena yumñaena make ga, sa ke ga naña Ntewa mñaena pa ruru e kiena.

<sup>11</sup> Visae sanene, popon tomñareran li naña tetol navaruruena wa nowo nene, ana pe pon re mñaena ita yar tai ve logear re Ntewa, yoko kilapalia.

*Visena kiena ne Ntewa po pañisi*

<sup>12</sup> Tesike vatanon visena kiena ne Ntewa, vanon kiena visena naga mali, miyumñae ke

ñarera pañisi, kilia yur malena kien yaru, mal pañisi taulu playu na mara naña mal lepas luwoka. Visena kiena ne Ntewa kilia va warpoyo va loyuma e losineta, kilia va lipere sur ya naña teke e kieta sitomena, pona visuveve ya naña teke e ninuta.

<sup>13</sup> Lelaga, naga naña yoko visuveve kieta malena, kilamarana tol make suria, tařatete ita yar tai tapolounia.

*Yesu pe kieta řarin yaru wa*

<sup>14</sup> Ntewa kilia make sur la ne lepas na e ita, ana potena pania naña narina, pupia řarin kieta yaru wa naña Yesu, naga mligan yo nini pa yalen silau ma e kiena yo ma metava e peni, pa kila ruru si mara wo pan Ntewa vanon ita. Ana vanon naña kila ruru ita ke temio Ntewa sanene, popon touarar nalelagaena ñarera ea, a popon ve teligan li re si naga pogos tai.

<sup>15</sup> Kieta řarin yar wa nene, naga pe yar ta naña pe mninue re kieta ursuen la poli, ana kilia ruru po pañisi naña ita pe tesumal re ñarera poli. Naga sinen miye ita, yoko iila ita, komin nanua naga mēna ga, natařaliena lala apim ke e naga ñarera pañisi pania e lepas punu ga, sa ke ga naña apim ke e ita. Naga sa ga ita, ana sur ga tai, natařaliena pe řere re nena naga mloru e mlamulena viowa poli.

<sup>16</sup> Visae ve sanene, tepisu sane tomal kieta mrapa narui vena tekilali naña telen ita teva la lavis pun lele natotanoena wa kiena ne Ntewa, naña pe purřes nen lemamiena. Ve temarau re sina, tekekaran naña teim puna Ntewa, ana



yoko tekilia tetol kiena sineyeena e kieta malena, yoko tevisu naña kiena nasinewoena iila ita e pog m̃arera ya naña tesike ea.

## 5

### *Yesu pe ãarin yar wa na sineyeen yar lala*

<sup>1</sup> La naña apuarar yuññaena na ãarin yar wa, apisiriplan la petan li wa tañena lala vena kilaen yuññaena na sanene narui. Yaru naña pe ãarin yaru wa, naga suñalu su likan yeririna lala a Ntewa, vena waren kiela nalaena lala amio nakuãaãaena lala vania, vena naga kilia viewo kiela mlamulena viowa lala.

<sup>2</sup> Parin yaru wa nene pisu kilale ruru naña yar la asuñña amiyuñña piowa ga, asuñña amiyepe ga petan mrapa, komin naña naga m̃ena pe kumpui ga, naga m̃ena kilia malum, kila sane sinena kilia ye ruru nena yeririna tañena lala, naga moñau ruru nena pan la.

<sup>3</sup> Naga sa ga yeririna tañena lala, ana pogos naña kila nakuãaãaena lala, monar kila ve vanon re ga mlamulena kiena ne yeririna lala, ana vanon m̃ena kiena mlamulena viowa lala.

<sup>4</sup> Komin sur ne nanene, pe pon re yar tai liganar si naga poli visave popon imi ve ãarin yaru wa, ana Ntewa ga kilia liganar yaru vena war pupia kia na sanene, sa naña naga mliganar yermarua Eron nanua sumo pe kieta ãarin yaru wa ãesa.

<sup>5</sup> A e lepas kiena Kristo, sa ke m̃ena nene. Naga pe kieta pupia ãarin yaru wa, ana naga pe pisirlua re naga pa metava sape naga sanene

poli, ana Ntewa ga pisirlua naga. Visena kiena ne Ntewa naña pisa sanene sike e nasirienna wa na sumo lala, naña ta pisa sanini, sape

*“Ko na nepisu sane ãane opim ope naruu nenaga,  
a in na nepim nepe arimoña kemua lelaga.”*

*Yauena 2:7*

<sup>6</sup> Tañena, pisa sanini, sape

*“In na nemligan ko sane yermarua Malkusteke,  
ko na yaru wa maro e kiena lus, naña yoko  
ouarar ña yuñaena nene vano-o ve uro re.”*

*Yauena 110:4*

<sup>7</sup> Ntewa mligan yuñaena nene pa Yesu, ana tepisu e pogos na kiena malena e yomarava nini, naga kila ke pa rui. Sila ga naga sitom manene yomarava nini pañisi, ana tagin pa Ntewa, wamarana mlau vanonia. Naga sumãalar ñarera sike e Ntewa sape visae kiena malena kovio, yoko Ntewa kila malia sina, ana naga ñareran la sane naña mlenwo itania.

Ana Ntewa pisu ãelaga wo na momãuena a navatanoena kiena ne Yesu, ana sinena myea, mloge kiena naviunena lala.

<sup>8</sup> Lelaga naña Yesu naga pe narina ne Ntewa rui, ana Ntewa tamãan naloge viowaena na pogos ñarera lala pimi pania, sape vian Yesu vena tol ruru ãelaga na logearena e kiena malena.

<sup>9-10</sup> Naga patanon make nasinenanena lala kiena ne arimana, pano-o kila make yuñaena la naña Ntewa mla pania, kila narui pisirlua naga sane yermarua Malkusteke. Sanene, Yesu pimi pe Ntewa kiena ãarin yaru wa, pim pe purpes

nen malena naŕa ve uro re kieta ita punu ga naŕa temlogearia.

*Popon teimi temarua ruru wo e Kristo*

<sup>11</sup> Ana kia naŕa Malkusteke, kiena suniena marua wo la sike ne, naŕa akilia akila meraravan ruru van amiu sanape e yar nene amio kiena yumãena. Mareran navisayu ruruen merarava van amiu, komin naŕa yam tai sa naŕa kiligamiu poŕe towe la sane. Ana visae kam na asitom asape aloge kilalelia,

<sup>12</sup> yoko wo vaŕisi, komin naŕa kam na amlelaga nakonua rui, ana atorokin naŕa aim ave navianena na visena wa kiena ne Ntewa rui. Ana peraga, asumã ga sa ga nene, ana monar avian amiu si ea, siar si e kana purŕes nen visena ne lala.

!Lelaga naŕa, kam na nakanen kinanen m̃arera la rui, ana sa ga naŕa asumã sinemiun ke amun yu na wa!

<sup>13</sup> La naŕa amun ke yu sanene wa ape sisi ke ga wa, ana taŕatete ave manmarua e visena na mrapa lelaga,

<sup>14</sup> ana la naŕa akan ke kinanen m̃arera, la amarua ruru rui. La ne sanene, kiela sitomena la miyumãe ruru pano-o apisu veve ruru make sur punu ga, ana akapur apimi po tol naŕa apisu kilale ruru sur ya naŕa po a sur ya naŕa piowa.

## 6

*Popon tevisuar ita ve towasuŕe re si teva varau*

1 Komin sitomena la nene, popon teligan ðelaga na sisi sike na, teva re laa sane wa e navianena m̃arera kiena ne Kristo na atorokin sitomena naþa marua.

Tepilopu ita e kieta yum̃aena piowa namarena la rui, tetol naviawaena e Ntewa rui, ana popon ve tesum̃a teva re si ea. Naga sa naþa tekilavan lelen yum̃a rui, pe pogos na visirluaen narui.

2 Apian ita e nakeena rui, apu þarita rui, temlelaga rui tesape yoko tesum̃al si e marena, a tekilia rui nalip̃ereena ta sike ne amio kana nakoena nena naþa yar viowa la akus vano-o taþatete þisi pogos tai. Sur la nene toþaro make e rui, ana pe pon re tesum̃a teteteliv m̃aga e sur la nene silaga poli, ana popon tesum̃a teva re laa sane temio kieta Suþe.

3 Sur nene m̃arera paþisi, ana visae Ntewa tam̃an ga van ita, yoko tekilia teyum̃aen wo ga.

4 Lelaga, yoko tekilali naþa teva re laa ga wa temio naga silaga, ana sanapen la naþa amloru, apa si varau rui?

La nene, la amial ruru þes e yomerarava asuñã akinan ke e lokove nae ma e peni rui, a Ninuna Wa pimi m̃ena e la, a pogos naþa apa si apiowa sanene, yoko taþatete si avilopu la awasuþe aim e malena.

5 Visena Wa kiena ne Ntewa mijila la e kiela malena rui, a atol towe m̃a nam̃areraena na suþenena naþa pimi ke ne,

6 ana pogos naþa apilopu si m̃asila, akila þarila sanene, yoko aim awo si sanape? Peraga, yoko viowa van la vaþisi, komin naþa akila ke sane asuar ke si Narina ne Ntewa meta e lak torovia,

sa naña asumã apisirilua ke naga e maran yar lala vena aviuelin kare si kiena kia.

<sup>7</sup> Asitomyuli na nene. Porotano naña mun yua naña mloloru ea, ana ãar manene kinanen kan la naña amiyumãe ke ea, ana Ntewa kekaran pañisi, kiena navisa ruruena sike ea.

<sup>8</sup> Ana porotano naña pe ãar re sur wo poli, ãar ga vilumĩni viowa lala, naga sa ga naña apiain ga maren pania, ana tañatete akila sur wo ta ea, yoko asikap ga narui.

<sup>9</sup> Erau lala lelaga pañisi, visena la ne sanene añarera pañisi, ana e lepas na pun amiu, in na pe nesitom re nesape kam na sanene poli. Peraga, noñasine amiu, sane mras nen malena viu naña po kapuru ke e amiu na wa.

<sup>10</sup> In na nemlelaga nesape yoko tañatete Ntewa sinen ãesan kiamiu yumãena wo lala, a yoko tañatete sitom korenan vinayaena a sineyeena naña kam na akila pania, pogos naña kam na amiila kiena nalelagaena wa tañena lala. Kam na amiyumãe po sanene, ana kila Ntewa kekaran pañisi, yoko naga mēna kila ruruia a kila wo van amiu.

<sup>11</sup> Sanene, nesape neiilaar amiu sina, vena ve ava re si varau, kam na añareran ava re laa ga wa, ava m̃aga atol ga luas rui, vena akilia atol sur punu ga naña kiamiu sitomena sike ea.

<sup>12</sup> Kam na ve ave yowen re, ve yepemiu malum re, ana monar avesinaia e yumãena maran ve taaga sa ke kieta yermarua wo la naña amasusun ruru yumãena, kiela sitomena la piayavi pano-o atol sur punu ga la naña Ntewa pisaar ãesan pan la.

*Visaarena kiena ne Ntewa pe lelaga pañisi*

13 Navisaarena ta naña Ntewa kila, naga kila pa yermarua Epraam, pisaar m̃arera pania e lepas na lus la naña yoko amolue raunia. Pe kia tañena re si naña Ntewa kilia visa vena kila kiena navisaarena nene m̃arera poli, komin kiena kia naga mon metavan make kia tañena lala, ana Ntewa pisaar ke sina e ga e kiena kia, sape

14 *“In na Ntewa, yoko nevisa ruru ko ve keviu vañisi, nekila kioṃa lus la aim ave moki vañisi e yomarava nini.”*

15 Ana Epraam lavisi sitom ãele visena nene, ana pisu naña Ntewa kila kiena navisaarena nene m̃arera ruru po pañisi, ana pe sur koren ga naña Epraam tol pogos m̃arera la mok pañisi, ana pe mligan re navisaarena nene poli, ãuarar ruru ṃa pano-o pisu naña siar tol ya naña Ntewa pisaar pania.

16 E lepas na ãelaga nakilaen navisaarena m̃arera, yar la asum̃a apisa kia kiena yar wa tai pona sur wa tai. Ana pogos naña yar tañena la aloge, la monar alelaga ea, tañatete si avisin sinekar vania, komin kia naña apisa kila visena m̃arera.

17 Ana sanapen Ntewa? Naga ṃena sinenan sape kila kiena visena van ita m̃arera ruruia, vena telelaga ea, ve tesitom ãele re. Ita na sane narina lala na waren kiena lalimana, ana naga sinenan sape tekiliaar ruru tesape kiena sitomena wo naña teke e ita tañatete ãisi pogos tai, ana kila kiena navisaarena pan ita m̃arera pañisi.

18 Navisaarena kiena ne Ntewa naña pan ita ñarera ruru sanene rui, komin naga pe pisokan li re poglis tai poli wa, kiena visena tařatete vilovilopu karea, ana metavan kiena navisaaren nene, pisa si amio kiena kia wa, vena kilaen kiena visena nene ñarera nenaga. Ana sur lua nene, kiena navisaarena amio kiena kia, lalua amiyuñae lele taaga vena kila ita tesuñal ñarera tese kiena visena. Ita topur matan yo viowa naña tesu řes ea, takalewele ke yo na suvanena, ana navisaarena lala kiena ne Ntewa akila kieta sitomena la piayavi ruru po. Sanene yoko tekilia teva tetol ruru yo wo naña Ntewa kila ruruia a mligan sike e marata woga ga naña.

19 Kieta nalelagaena ñarera nene, naña tesape yoko Yesu tamalia ita, naga sitomen ta naña sane kilavaru na tararen waa. Yoko ũarar ruru kieta malena, vena ve sur re si ta naña kilia werelua ita, vano-o tol pogos naña teva varaun pupia kulmrae loyuña e Yo Wa naña pe Yo Wa pařisi. E yo nene teva tesuñal nena tese marana ne Ntewa, yoko kieta sitomena lala akilia añarera ruru ke na wa asape woga ga van ita.

20 Naga nene komin naña Yesu sumon ita pa e yo wa nene rui, pa kila kiena yuñaeana sane kieta řarin yar wa, vena kila kieta mara wo temio Ntewa.

Sa naña tepisa rui, naga sane pe řarin yar wa maro na lus kiena ne yermarua yaru wa Malkusteke, ana naga pul plan kieta mlamulen viowa la rui, a yoko kila ña kiena yuñaeana na sanene vanon ita vano-o tařatete řisi pogos tai.

## 7

*Malkusteke na sumo naga mon la metavan  
make ãarin yar wa taãena lala*

<sup>1</sup> ?Ana yermarua Malkusteke nene, naga ai, a kana suniena naga pa sanape? Tus naãa Nasiarena pisayuia, pisape naga pe yar na pogos kiena ne Epraam nanua sumo, pe ãarin suãe na kumali marua wa naãa Salem, a naga pe pupia yar wa kiena ne Ntewa na mava. Ana pogos tai, yermarua Epraam pa kila mara pa kiena nasinekar lala, naãa ãarin suãe taãena lala, ana taulu la, ãasuãe ke si narui, pitawe Malkusteke kinae patanonia, ana Malkusteke pisa ruruia.

<sup>2</sup> Ana Epraam mla nalaena pania, mlalua lualima petan ponotia na sur make la naãa taulu e pogos na mara naãa ãarar ke sape wasuãe si va mãana. Pupia yar wa nene naga pe yar tai, sa naãa kiena kia ga luwoka apisa. Kiena kia ães nena, Malkusteke, kana kinasa pisape “ãarin suãe na mesmesu,” a kiena kia na lua pisa sanini, sape “ãarin suãe na sumãare,” komin naga pe ãarin suãe nae pulkumali naãa Salem, naãa kana kinasnena na sumãare.

<sup>3</sup> Yar nene, kana suniena nena pe taãena ga, komin naãa pe temloge re apisape kiena yermarua lalua na sanape, pona aãa repina lala la ape lus nae pe wa. La pe apisawal re kiena maliena poli asape aãa siar sanape, a pe suniena na kiena marena re poli. !Sa naãa naga pe mare re nena poli, sumãa ãuarar ke kiena yuãaena na wa! Sanene, naga sa ga narina ga Ntewa



narui, naŕa yoko naga ve kieta yar wa m̃a vano-o taŕatete ŕisi pog tai.

<sup>4</sup> Komin sur la nene, tepisu e visena marua kiena ne Ntewa naŕa kia na Malkusteke, naga pe kia tai naŕa pa metava paŕisi, pano-o tol repita yermarua Epraam, naŕa asitom ke asape naga mon la metava rui, naga m̃ena patanonia, ŕar nawaren pania e komp̃as nen sur la naŕa taulu e mara.

<sup>5</sup> Ana ŕelaga na laen nawarena na sanene, naga ŕelaga ta naŕa navisaluaena pisape le Israel lala la monar akila luen ga. Kiela yar wa lala na lus kiena ne Livae, la monar avisuar ruru la, awarplan lualima petan ponotia e kiela sur make ga van la, komin la na sa ga namratava taaga, naŕa ape lus kiena ne Epraam.

<sup>6</sup> Ana Malkusteke nene, naga pe nae re mratava puna ne yermarua Epraam poli, ana Epraam pisu kilalea sape naga yaru wa tai, mliŕere nawarena komp̃as pania. Yermarua Epraam nena naŕa Ntewa pisaar sur wo la pania, ana naga patanon Malkusteke.

Ana pogos naŕa Malkusteke tol nalaena nene, kekara, pisa ruru Epraam, a nanene kila meraravan si pan ita sane naga mon manene la metavana,

<sup>7</sup> komin yar naŕa torokin visa ruru yar taŕena, naga monar mon laa metavan yar nene.

<sup>8</sup> Ana Malkusteke amio yar wa taŕena la nene, la make ga atol kiela nalaen la torok ga, ana la ape taŕenan sur tai. Suri nene sanene, sape yaru wa lala aŕar kiela, ana siraunia amarmare, ana

Malkusteke mla kiena, asape naga suña pano-o pe mare re poli.

<sup>9</sup> Ana sanaña Malkusteke mon la metavan yermarua Epraam, naga mon mña metavan pupia kia taña naña Livae. Lelaga kemua, Livae naga pñesan naña pe repina ne lus kiena ne yaru wa lala, ana naga mña ga molue kome lus kiena ne Epraam, ana pogos naña Epraam patanon Malkusteke, mla nalaena pania, sa ga naña Livae mña patanon Malkusteke mla nalaena pania.

<sup>10</sup> Suri nene naga sane pogos naña Epraam mñalivin Malkusteke, kila pania, Livae pe paeme re e repina nene poli wa, ana sa ga naña naga mña kila.

*Yesu pe molue re e lus kiena ne yaru wa la poli, ana molue ga kome lus viu tai*

<sup>11</sup> Ana visena la ne ma metava apisawal ke pupia sur ta ne pañisi. Akila meraravan asape Ntewa pñere plan lus na yaru wa lala kiena ne Livae, pisirilua lus taña tai kiena ne yar wa lala, kus lлена. Yermarua Eron mña pisirlua yuñaena na lus kiena ne yar wa lala, ana Mosis pñar kiena navisaluaena nene pimi mñalivi, ana visae Ntewa visu sane sur lua nene torokin kila ita temesmes ruru nena temio, vera na ligan suña ga. Ana peraga, naga pilopuia, mligan si pñarin yar wa viu tai pimi mñalivin ita, naña pe lus kiena ne yermarua taña nene Malkusteke.

<sup>12</sup> Ana komin Ntewa pisirilua pñarin yar wa viu nene, mesmesun mña naña visirlua kana navisaluaena viu tai.

13 Monar ve sanene, komin e nene naga pisayu kieta Suṽe, naṽa naga ṽalivi e lus ta naṽa pe la re nena ta suṽal se wonta ana kila yuṽaena kiena ne yar wa poli.

14 Lus naṽa Yesu ṽalivi ea, tekilia tesape naga lus nae Suta, ana pogos naṽa Mosis pisawal kia kiena ne lus kiena ne yar wa lala, naga pe pisawal re nena kia naṽa Suta poli.

15 Ana lus na yar wa taṽena lala suṽa ga, naṽa Yesu molue komea, nane lus kiena ne Malkusteke naṽa tepisasa ke narui. Sur ne nane kila narui tepisu sane Yesu pe sa re yar wa taṽena la poli, ana naga sa nena Malkusteke ne narui.

16 Taṽena la nene, apim ape yar wa komin ga naṽa sane ape kana lus na kuruta mal nene, sa naṽa navisaluaena marua pisa, ana Yesu pimi pe kieta ṽarin yar wa e pupia naṽareraena na kiena malena naṽa taṽatete akila karea, naṽa sike sike lue narui.

17 Tekilia tesape naga su lue sanene, komin naṽa visena kiena ne Ntewa pisa rui, naṽa sape *“In na nemligan ko sane yermarua Malkusteke, ko ope yar wa maro na kiena lusa, naṽa yoko ouarar yuṽaena vano-o taṽatete ṽisi pogos tai.”* *Yauena 110:4*

18 E nene, pimi merarava ruru pan ita sane Ntewa pilopu kiena mrapa na yuṽaena. Mrapa marua naga navisaluaena kiena Mosis na sumo, naṽa suṽal sukaṽar paṽisi, ana sa naṽa kiena naṽareraena naga pe torokin re kila sur wo ta van ita poli.

19 Naga kila ṽele yon naṽa kila mesmesun ruru ita, ana Ntewa mligan mrapa marua nena sike

ga narui, kila si sitomen viu ta pa metava, kus lelana. Mrapa viu nane tekilia telelaga m̄arera tesape naga pe mrapa namalena naṣa pe lelaga, naṣa kilia sumon ita teim lavisin Ntewa.

<sup>20</sup> Ana mrapa viu nena, navisaarena kiena ne Ntewa tai kilarar ŝum̄alar m̄arera su lue na sike ne. Yar wa taṣena na sumo lala, poglis naṣa apuarar ṣarila, amiyawawo la vanon kiela yuṣaena, pe navisaarena re tai sanene poli.

<sup>21</sup> Ana pogos naṣa Ntewa pisirlua Yesu pimi pe kieta ṣarin yar wa, kila amio kiena navisaarena m̄arera tai. Naga sa naṣa visena tai na Tus na Yauena Wa Lala pisa, naṣa sape

*“Ntewa pisaar m̄arera rui, ana taṣatete si vilopu kiena visena nene, visave*

*‘Ko na yoko ouarar yuṣaena sa naṣa ṣarin yar wa kiena ne kiau yeririna lala, vano-o taṣatete oṣisin pogos tai.’ ” Yauena 110:4*

<sup>22</sup> Ana Yesu ṣuarar ruru kiena yuṣaena nena sanene, pe kile na naviranarena viu kiena ne Ntewa amio ita, naṣa po manene la taulu na sumo, a pe nasiaren suri la naṣa Ntewa pisaaria pan ita, yoko kila make ruru nena van ita sirau.

<sup>23</sup> Nanua sumo na yar wa la moki, komin naṣa ta miyuṣae pano-o kovio, taṣena kus lelana, miyuṣae m̄a pano-o, naga m̄ena kovio, la akilakila sanene. La taṣatete asu lue,

<sup>24</sup> ana Yesu, naga yoko su lue ga narui, ana yoko naga taaga ga uarar kiena yuṣaena sa naṣa kieta ṣarin yaru wa vano-o taṣatete ṣisi pog tai.

<sup>25</sup> Sanene, naga sike ga e marana ne Ntewa silaga, mlen lue ga pania vanon ita, ana kila sane ita nanagane, pona ita la naṣa tepim ke rau wa,

ana naga ke narui naña yoko tamalia make ruru ita punu ga naña teva tokom puna teim lavisin Ntewa.

*Yesu na pe ãarin yaru wa nena napo*

<sup>26</sup> Tekekara pañisi naña Ntewa pisu sane popon ligan ãarin yaru wa ta naña po manene sanene imin ita. Naga pe yar ta naña pe yaru wa pañisi, pe napiowaena ta to re nena ea ãisa, merarava pañisi, kiena ãelaga pe sa re nena yar na kilaen mlamulen viowa la poli, kiena kia pa manene laa to metavan punu ga sur nae peni.

<sup>27</sup> Yar wa tañena la nene, la monar akila luen ga kuñañaena na ikikena legiena punu ga. Sumo, monar akila vanon si kiela mlamulena viowa lala, a siraunia, akilia akila vanon mlamulena viowa kiena ne yeririna tañena lala, ana Yesu na pe sa re nene poli. Naga kila kuñañaena na ikikinen mlamulena viowa na yomarava wetelu yam taaga, nanene e pogos naña kuñañain si tasnena vanon ita.

<sup>28</sup> Lelaga kemua naña navisaluaena marua pimi sumo, ana kiena ãarin yar wa pe yar ga, malum ga, ana naviranarena viu naña pimi marea, kiena ãarin yar wa naga mesmes lue ga, nane Yesu narina ne Ntewa.

## 8

*Naviranarena viu: yuññaena kiena ne kiena ãarin yar wa naga po manene la*

<sup>1</sup> Ana vianen la naña meta ne apisa sur mok liu e lepas na ãarin yaru wa lala. Ana pupia purñes nen visena tai suña ga, naña popon tesitom

urmi ea, naña pisa sape kieta ãarin yaru wa wo tanea ta sike rui. Naga Yesu, naña ãasuþe si pa ma e peni, ana Yerkawa Keviu na Yo na Ma Metava mligan naga totano teke e leþas nena na ãamarua.

<sup>2</sup> Naga sike e yo nene, kila ke kiena yuñæna wa lala, sa naña yaru wa la nanua sumo akila lotena e yuñæ kanus wa naña e yo mema. Ana lelen kilaen lotena nene, yar ga la amiyuñæna, ana kieta ãarin yaru wa Yesu naga miyuñæ ke loyuñæ e yo na lotena naña po, pe lelaga ruruia, naña Ntewa ga miyuñæna.

<sup>3</sup> A ãarin yaru wa taþena la nene, kiela yuñæna, silaga apisir plan la vena waren nalaena va Ntewa, a akila kuþaþæna la pania, ana popon teviun tevisave kieta ãarin yaru wa nene, pona naga mñena mla nalaena pa Ntewa, a kila kuþaþæna pania?

<sup>4</sup> Visae e ga e yomarava nini, yoko taþatete avisu naga sane yaru wa tai, komin naga pe molue re kome lus kiena ne Livae poli, naña navisaluaena pisalua pan la sape lala ga akilia awar nalaena va Ntewa. Sanene, kieta ãarin yaru wa nene sumæ miyuñæ ke ga e yo wa na ma e peni.

<sup>5</sup> Yo wa na yomarava nini, amio yuñæna la naña akila ea, naga sa ga kana yanen ga, ana naga naña ma e peni, naga napo nena ga lelaga. Ntewa mñena pisa sa ke ga, pisa kilale pa Mosis, ve sanape naña yoko yuñæen yuñæ kanus wa, pisape yoko yuñæen taveve kana nono nena torokin naña naga pisuia poglis naña pa ma e

tavie.

<sup>6</sup> Ana sanene tepisu naþa Yesu kieta þarin yaru wa pe lelaga napo, a kiena yuþaena punuga powo la sane. Naga totano likan ita temio Ntewa, miyuþaen naviranarena viu tai van ita temio naga po manene la sane, naþa sike e navisaarena lala kiena ne Ntewa naþa po laa sane, pano-o tepisu naþa sike ma e yo wa na peni kila yuþaena po manene laa sane.

<sup>7</sup> Visae naviranarena þes nene naga woga ga rui, vera na taþatete si nalua nena, ana peraga, kila narui nanagane Ntewa pisirlua naviranarena viu amio ita naþa po manene rui.

*Naviranarena viu: Ntewa pisaar nanua rui*

<sup>8</sup> Naviranarena naþa na sumo, Ntewa pisu sane pe miyuþae po re poli, pe torokin re kiena sitomen poli wa, ana kila naga pisaar sina na urviu tai. Naga pisawal sanene e visena ta naþa mla pa Navisawalena Seremþaea vena visawalia. E visena nena, Ntewa pisaar sanini, sape

*“Ayagogo ruruia. Sineun nesape nevisa van amiu nevisave pogos ta pimi ke ne, naþa yoko nekila naviranarena viu tai nemio amiu kiau yeririna lala, kam na lus kiena ne Suta amio lus nae Israel.*

<sup>9</sup> *Yoko naviranarena nena ve maran taaga re amio naþa nekila nemio kiamiu yermarua la nanua sumo ne. Naviranarena na urmarua nene, naga e pogos naþa sineu mie la, noþere plan la e pogos mþarera gar Isip, ana siraunia, pe asitoþal re si naviranarena nene poli, pe amlogear re si poli, kila narui in mþena nepilopu mþasuu pan la.*

10 *Ana nanagane, yoko nevisirilua si naviranarena viu tai nemio si kiamiu lus lala. E naviranarena nene, yoko nekila sanini:*

*Yoko neligan ruru kiau navisaluaena lala sike e kiela sitomena lala, yoko nesiri kiau visena la sike e losinela lala, yoko neim neve kiela Ntewa kemua lelaga, a yoko aim ave kiau p̄egas nen yeririna.*

11 *E pogos nene, taṗatete si akilali naṗa avian la, sane ta kilali naṗa pisawal van nalavis puna, visave 'Ke, mrapa nanene,' pona ta pisawal va wenla, visave 'Ntewa, naga sanene sanene.'*

*Peraga, yoko taṗatete si akila ve sanene, komin yoko la punu ga veve taaga avisu kilale inu e kiela malena, siar e la naṗa pe kiela kia re poli, vano-o tol kiela yerkawa ne lala.*

12 *Nepisaar nesape kiela napiowaena lala, yoko neviewo nena ga, a kiela mlamulen viowa lala, yoko ve nesitoṃal re si na rui.*

*Nane kiau naviranarena viu ne nanene narui nemio kiau yeririna lala."* *Ser 31:31-34*

13 *Ana e kiena visena nene, Ntewa pisayu naviranarena viu nene, kila ita tepisu kilale sane naga pisu ke kiena naviranarena na sumo nene sane pe urmarua rui. A sitomena ta sum̄a ga sane sur naṗa Ntewa pisa ne sape pe urmarua rui, nagane pito la tano narui, ve ve viavi re yoko kovio make nenaga.*

## 9

*Naviranarena viu: kiena lele na lotuena naga po manene la*



<sup>1</sup> Ana tekilia ruru po naña sane naviranarena marua, naga kana mrapa lala na kilaen lotena asuñña ga, amio mēna kiena lele na kilaen lotena tai, naña sike ga yomarava nini.

<sup>2</sup> Lele na kilaen lotena nene, naga kana yuñña kanus wa nena, naña aņere pupia kulmrae ea, akila pñerea sane loyuñña lua. Lepas tai, naña apio asape Yo Wa, purpēs nen kapi vivaga tai naña kana koruas olua sike ea, amio varvara tai na kilaparavi lualima yam taaga pa lua, naña apio kilaparavi na vianen van Ntewa.

<sup>3</sup> A varaun kulmrae nene, lepas pñas na vano, naga apio asape Yo Wa naña pe Yo Wa paņisi.

<sup>4</sup> Loyuñña e yo nena, naga kana wonta na ponotaninu nena naña amiyuññaen e kol, amio pias nen navisaluaena. Pias nene amiyuññaen kana kulusa e kol, yepas na loyuñña a vanua, naña e kana loyuñña nena, amligan ruru sur telu sike ea. Nasumo, naga pialora naña pe kol, naña kinakinasnen kinanena na yo mema naña asape mñana teke ea, a sur na lua, naga plasgai kiena ne yermarua Aron naña nanua na pitovi, a sur na maro, naga kilavaru lua naña pe lepalepasa naña Ntewa siri kiena navisaluaena sike e la.

<sup>5</sup> A e wos nen pias nen navisaluaena nene, naga pe keplamarana, naña asape lele na totanoena na sineyeena kiena ne Ntewa. A nono lua na navisi asuññal asike meta ea, naña akian kupela suvivi yo naña naurarena kiena ne Ntewa pitom ke tano ea. Ana yo wa na lotena naviranarena marua naga kana sur ne la powo paņisi, ana taņatete si tevisa sur ve

moki e lespasnela. Ana sur na visaena taaga, tesape yo na lotena nena, amio kana sur ne lala, naga amiyumãen ga e sur na yomarava la nini, tařatete nena sike sike lue, naga pe po re sane yo na lotena na naviranarena viu poli.

*Naviranarena viiu: kana nakuřařaena nena naga po manene la*

<sup>6</sup> Sur la ne sike meta ne, nane sur ke la nene narui nařa amligan ruru sike loyumuãa e yumuãa kanus wa na sumo nanua ne, ana poglis nařa yar wa la apa loyumuãa, amiyumuãae amio la. Ana silaga, apava ke e ga e yo wa nařa mon řesa,

<sup>7</sup> ana e yo wa na lua nařa pe yo wa manenea, yar wa lala pe apa li re nena loyumuãa e poli. Yo nene yar taaga kilia va loyumuãa ea, nane kiela řarin yar wa, a naga pe pa re silaga poli, kilia va ea yam ve taaga ga e kasa. A visae pogos nařa vavini, tařatete va koren ga sanene, ana monar taveve kana mrapa ne lala.

Sumon nařa vavini, monar kila kuřařaena e sur mal tai, ana monar war piasnen kana kuruta nena va loyumuãa sane nalaena tai, nanene na e lepas nen kiena mlamulen viowa amio kiena ne yeririna lala.

<sup>8</sup> Ana pogos nařa akila ke sanene, naga sane pe kile na Ninuna Wa nařa kila meraravan pan ita sape pog nařa visae yumuãa kanus nene susu mãa ke ga wa, vera na ita yar kar la pe kieta mrapa re nena ta poli nařa teva toworu e yo nařa Ntewa sike ea.

<sup>9</sup> Kanus na yumuãa wa nařani, amio kana kulmrae nena nařa telan liřere loyumuãa, a kana

sur ne lala, la na ape sur na konua na ãa rui, ana apisa ke pupia sur ta ne pan ita na nagane ne. Akila narui tesumã tepisu kilale tesape nalaena la naãa yaru wa lala amlavia pan Ntewa, amio kuãaãaena la naãa akila ke ne, akila poga ga, ana sur la nene taãatete kilia kila yeririna la aloge sane kiela sitomena la mekiki ruru nenaga e navisuena kiena ne Ntewa.

<sup>10</sup> Akila sur la nene, amio ya la naãa narin navisaluaena la apisa, naga nene e ãepas na mrapa na yumãenen kinanena amio namunena, a e ãelaga na kevanen sur lala. Ana sur la nene ape na yepas nen yar ga na vanua, ana pe atol re losinena pona kiena sitomena poli. Kieta yermarua la apuarar ãa ãelaga marua na sanene pano-o, ana sur la nene na ve nauarar laen ga vano-o tol pogos naãa Ntewa kila kieta mrapa vii, naãa kana naviranarena vii nena naãa pimi ãaliv rui.

*Tana ne Kristo kevan ita mekiki rui*

<sup>11</sup> Ana pogos naãa Kristo pimi ãalivi, naga pimi sane kieta ãarin yaru wa, naãa pe na ãelaga marua re poli, ana pe na mrapa vii, vena kila narui tekilia tetol navisaruruena wa la naãa Ntewa mligan ruru sike na. Naga pe pa miyumãe re e yumã wa kanus marua na sumo poli, miyumãe e ta naãa po manene la paãisi, pa la metavan nene. Yo wa naãa kila ke yumãena ea, pe yar re miyumãen e limana po, a pe su re ãena e yomarava nini poli, sike nena e yo merarava e marana ne Ntewa nae peni.

<sup>12</sup> Ana pogos naãa Kristo pa loyumã e yo wa nene, naga pano pano-o tol nena kana yo wa

naña pe yo wa nena napo, ana pa yam taaga ga, pe navaen re si pogos tañena poli. A pogos naña pa loyuma, kuruta naña naga ãaria pe pe kuruta na nane re poli pona kuruta na narin puluk, ana kana kuruta nena napo naña mlau e lak torovia. Ana kurutana sike e marana ne Ntewa sanene, taulu naul luaen kieta mlamulen viowa la, naña taãatete ãis pog tai.

<sup>13</sup> Monar ve sanene, komin naña e ãelaga marua, visae yar tai kila sur ta viowa, amla narin kuruta na nane pona puluk, amio posnoyavi na narin puluk naña askapia, amla pa e yo wa. Ana e pogos nene asitom asape nalaena na sanene kilia kila yar nene ikiki si e marana ne Ntewa.

<sup>14</sup> Ana visae kuruta na sur mal ga la akila sanene, yoko kuruta kana Kristo naga kilia kila va ve keviu laa sane. Kristo pe yaru wa tai, naga mekiki ruru nena ga, pe kororaki ta to re e poli, ana naga tamãan kiena malena vena Ninuna Wa la va Ntewa sane nalaena tai, ana naga pim pe kieta natamaliaena. Sanene, yoko kuruta kana Kristo kilia kila sineta la ikiki, kilia wereplan ita vetan kieta yumaena na marena lala, pisir plan ita vena tekila yumaena lala kiena ne Ntewa mali.

*Tana ne Kristo kila naviranarena viu sumãalu ãarera*

<sup>15</sup> Ana komin naña Yesu kila yumaena wo pan ita sanene, tekilia tevisu naga, sane naga pe yar na waren sur wo lala na viranarena viu imi ãalivi e ita. Nanene naga miyumaen e kiena marena, naña sane marena ta naña pul plan make maliena kiena ne yeririna lala naña akilaro

navisaluaena lala na viranarena nasumo. Ana komin naþa naga pul plan ita sanene, kila sane visae ita a naþa Ntewa vio ita, tekilia tetol kieta lalimana naþa yoko taþatete þis pogos tai.

<sup>16</sup> Visae Yesu ve mare re, taþatete tetol kiena lalimana la nene, ana sa naþa sane mare kemua lelaga, navisaarena make ga naþa na naviranarena nena apim sane visena maro kiena Yesu, ana sur make ga pimi e limata.

<sup>17</sup> Komin naþa visae yar tai visaar maron sur tai sa naþa kiena visena maro, ana pogos naþa naga mal ke ga wa, apuarar ruru kiena visaarena nene suþa ga, ana pe amiyuþaen re poli suþa pano-o tol pogos naþa visae naga mare narui, yoko ayuþaen ga na wa.

<sup>18</sup> Sa ke mþena naviranarena naþa Ntewa kila þesania, naþa visae kuruta na kuþaþaena lau, ana visena naviranarena suþalu.

<sup>19</sup> Sur nene Mosis mþena kila, naþa Ntewa kian kiena navisaluaena la pania ma e tavie, ana pitomi tano pisawal make kana visena ne lala pa yeririna lala, ana pogos naþa pisawal make pae, mþemoþar nakuþaþaena ne lala, vena kila sa naþa visena navisaluaena nena amali, a asuþalu. Aþne moþar narin puluk lala a nane la naþani ana naga mla kala narin kuruta ne lala, taron narin wii pito amio, ana mla narin laki tai, apio asape isop, piar vilus nen sipsip naþa pivaga pa ea, ana puton pito e kuruta naþani, peven ve tokak ga e tus navisaluaena nena, a peven mþena e yeririna lala, pisawal pan la, sape

<sup>20</sup> “Naga nene kuruta na sur mare naþa vena kilaen navisaluaena kiena ne Ntewa mali. Ana

monar tewatanonia a telogearia.”

<sup>21</sup> A sa naña peven kuruta nene e la, ana peven mña ve torokaki e yuña tapolen nene, amio sur la naña asike loyũa ea, naña asumña akila ke kiela lotena amio la.

<sup>22</sup> Mrapa na yuũaena la naña na navisaluaena marua nene la sa ke nene narui, naña lavis sur make ga naña amiyũae ke amio la, monar aveven kuruta ea vena akila aim ave sur wa silaga. Naga nene sane kila meraravan pupia sur ta ne pañisi van ita, sane visae kuruta ve lau re, mlamulen viowa tařatete aviewoia.

*Naviranarena viu: kana kuřařaena řar plan make ga mlamulena viowa lala na yomerava*

<sup>23</sup> Sanene, sur la naña li wa la amiyũae ke ea, monar akila mekik lue ga taveve kana narin řelaga ne lala. Ana yuña wa kanus nena, amio kana sur ne lala, la ape sur na yomarava ga nini, ana sanapen yo wa naña na lelaga, naña nane Ntewa teke ea ma e peni? ?Naga mña monar kana kuřařaena na viewoen tai? Ee sanene, naga mña monar kuruta lau vena kila make kana sur ne la ve sur wa, amio mña yeririna la naña apa ke ea. Ana kuřařaena na yo wa nae ma e peni, naga pe sa re kuřařaena na sur mal la naña akila ke e yo wa na yomarava nini poli, naga pe kuřařaena tai naña keviu manene la, a po lue ga.

<sup>24</sup> A kuruta na kuřařaena nene sike e marana ne Ntewa rui, komin kieta řarin yaru wa Kristo řar pa loyũa e yo wa rui, naña pe yo wa re ga

naña yar la amiyumãen poli, ana yo wa nene yo wa lelaga napo, nane ma e peni.

<sup>25</sup> A pogos naña kila kiena kuñañaena nena, naga pe sa re naña ãarin yaru taña wa la akila ke poli. La akuñañain ga kuruta na sur mal lala, ana naga kuñañain ke si na kana kuruta. A silaga apa akila e kana yo wa nena yam taaga e kasa punu ga, la akila luen ga sanene pa ke ne, ana naga kila yam taaga nena ga, pe nakilaen re si pogos tai poli.

<sup>26</sup> Visae Yesu monar kila luen ga kiena kuñañaena nene vanon mlamulen viowa la naña yeririna la asumã akila lue ga pa ke na, kana kinasa sane siar e nasiiena na yomarava nini pimi tol nanagane, naga tamalele ga mneke e lak torovia mloge piowagan naña kana kuruta mlau lue silaga.

Ana e naliganaren naña Ntewa pisir lua naga pe sa re nene poli. Naga pisu naña luas nen pog naña tesike e nanagane pimi ke lavis narui, ana kila Yesu pimi paemen ita mare ga na wa. Naga pimi mñalivin ita, kuñañain make nena kiena malena, mne plan ãelaga na mlamulen viowa.

<sup>27</sup> E lepas naña ita yeririna lala, Ntewa kila sape temal e yomarava nini, ana yoko tokovio ea ãisi na temal sina vena teva e nalipereena,

<sup>28</sup> a e lepas kiena ne Kristo, naga mne sa ke ga. Naga pimi mñalivi e yomarava nini, siraunia kuñañain naga ve na waren kieta nakoena na mlamulen viowa lala, ana yoko naga imi mñaliv si yam ta ne, pe na ulen re si mlamulen viowa poli, ana ve na wereplan ita vetan nakoena na

kieta mlamulen viowa. Sanene, ita tořasine ke ga naga, tesape monar naga imi tamalia ita.

## 10

### *Nakuřařaena kiena ne Yesu naga po la sane*

<sup>1</sup> Tesitomyu li si navisaluaena marua kiena ne Mosis. Naga pisa mña sur wo lařasa, ana pe pisawal make re navisaruruen wo nařa Ntewa sinenan sape Kristo kila imi mñalivin ita poli, kila sane navisaluaena nene sane pe kulus ga, ana pe kana kinas re napo poli. Navisaluaena marua nena, naga suña kila ke ga kana kinakinas la sanene, kana kinas nene sane kiena kuřařaena la nařa akila silaga, maran taaga ga e kas punu ga, pe atorokin re poli, tařatete akilavan make la nařa akila ke lotena amio.

<sup>2</sup> Visae peraga, vera na la nařa akila lotena sanene, aim amekiki ruru make wo řisi, ve aloge re si sane mlamulen viowa sike e la, ve asitom re si kilaen kuřařaena, ana peraga, akila ke sina ga sanene silaga.

<sup>3</sup> Kuřařaena lala, popon nařa kila nařa aninu sane pe kiela mlamulen viowa re si poli, ana peraga rui, e kas make ga apisu sane kuřařaena la nene akila sane asitoñal si kiela napiowaena lala, ana amloge sane kororak na kiela mlamulen viowa sike e la wa pano-o pimi piowa manene la.

<sup>4</sup> La amninu ke sanene komin nařa kiela sitomena ta sike na, nařa asape kuruta na purwolu puluku pona kuruta na nane kilia yumu plan kiela mlamulen viowa sanape ne? Sur nene,



asitom p̄ele pāp̄isi, pano-o apisu sane peraga, āp̄i p̄ele yonia, kiela mlamulena viowa su m̄a ga.

<sup>5</sup> Ana komin sur ne la nanene, pogos nāpa Kristo pitomi m̄alivin ita e yomarava nini, naga pisawal kiena mrapa viu narui. Naga mla visena tai nāpa teke e tus na Yauen wa lala, pisa pa Ntewa Arimana, sape

*“Ko na pe sinom̄an re si kūpāpaena lala amio nalaena lala poli, ana okila ruru tasneu nāpa yoko netam̄an van ko.*

<sup>6</sup> *Sur la nāpa asikap lele ke ne, opisu apiowa ga, a nalaena la nakilaena mlamulen viowa ikiki, pe sinom̄an re nena ga.*

<sup>7</sup> *Ana siraunia, nesum̄alu nepisawal ruru pan ko, nesape*

*‘Ntewa in na nekekan ga nekila ya nāpa ko sinom̄ania,*

*sur ne nanene in na nepitominia, sa ga nāpa Tus Marua sape yoko nekila.’ ”*

*Yauena*  
*40:6-8*

<sup>8</sup> Ana popon tevisu ruru visena nāpa Kristo pisa ne. Sur p̄es nāpa pisa, pisa ke kūpāpaena lala amio nalaena tāpena la nāpa asum̄a akilakila ke ne, pe sur korena ga nāpa navisaluaena sape monar akila, ana Ntewa pe mloge re nena pon la, a pe sinenan re si sape akila poli.

<sup>9</sup> Siraunia, sur na lua nāpa Kristo pisa, naga sape tam̄an naga narui, vena imi kila nasinenanena kiena ne Ntewa.

E nene, tepisu mrapa na sumo na kilaen kūpāpaena komin mlamulen viowa lala, Ntewa koven lua nena ga, ana kom ga e kiena mrapa na lua.

10 E mrapa viu ke nanene narui, Yesu Kristo kila sa naña nasinenanena kiena ne Ntewa pisa, tañan make tasnena wetelu, nane kila narui tepim temekiki a tepe wa e marana ne Ntewa, sike sanene sulue narui.

*Kuṣaṣaena kiena ne Yesu naga sulue na sike ne*

11 Yar wa la naña asuña amiyuñae ke e ṗelaga marua, monar la ṗas naña e legiena make ga asike e Yo Wa. La asuña akila ke narin kuṣaṣaena la silaga, naña akila lue ga maran taaga silaga. Kuṣaṣaena la nene akila ke ne komin mlamulen viowa la naña yeririna la akilakila ke na, ana pe atorokin re nena naña akilia awar plan ṗelaga na mlamulen viowa petan malena ken yar la poli.

12 Ana kieta ṗarin yaru wa naña Yesu, kiena kuṣaṣaena na pe sa re nene poli. Naga kuṣaṣain sur taaga ga panon mlamulen viowa make ga, a kila yam taaga ga, ana pogos naña naga kila pae, pa teke metava e yepas nena Ntewa na ṗamarua.

13 Ntewa pisu Yesu kila ña sanene, na pisawal pisape yoko war nasinekar kiena Yesu lala, ligan la asike vatanonia sane takue tai naña yoko vilavan lana ea.

14 Pe yuñae taṗena re si ta naña yoko Yesu monar kila sanene poli, komin naga mla nalaen ṗisi rui, naña kana kuruta kila ita temekiki, nanagane tepo rui e marana ne Ntewa, tesu ruru tesu ña sanene vano-o taṗatete ṗisi.

15 Ninuna Wa ñena miakol visena pan ita e lele nene, e visena ta pimi kome Navisawalena Seremñaea. E visena nena, Ntewa pisa sanini sape

16 *“Ana nanagane, yoko nevisirlua si naviranarena viu tai nemio kiau yeririna lala.*

*Ser 31:33*

*E naviranarena nena, yoko nekila sanini: neligan ruru kiau navisaluaena lala sike e kiela sitomena, nesiriar kiau visena lala sike e losinela.”*

17 Ntewa pisa pa sanene ana sukol si pa la sane, pisa sanini sape

*“Yoko kiela mlamulena viowa lala amio kiela napiowaena lala, tařatete si nesitořalia.”*

*Ser 31:34*

18 Visena nene pisawal ke pupia naviewoena nařa Ntewa kila pan ita rui, ana visae ve sa kemua nene, pe nalaen tařena re si ta nařa tekilia telavia komin naviewoen kieta mlamulen viowa lala pona kieta napiowaena lala, komin nařa Ntewa kila ruru řisi rui.

*Ve temaraun re va lavisinen Ntewa*

19 Wolai a vineu lala, sa nena nařa visena la nene apisa narui, kuruta kana Yesu pike mratavan ita rui, ana pe pon re si temarau poli, popon tokom ea teva loyuma e Yo Wa nařa Ntewa sike ea.

20 Sumo na pupia kulmrae nene telan mono kieta mrapa, ana pogos nařa tasnena ne Yesu porovia, kulmrae mřena nene purřa lepas lua, pietavan kieta mrapa na vaen loyuma. Nana-gane řesike e mrapa wo ne narui, nařa pe mrapa viu tai, a pe mrapa na vanonen malena.

21 Ana Yesu kila kieta mrapa navaen loyuma e Yo Wa sanene, naga pimi pe kieta pupia yar wa, nařa naga pisuar make ita ga la nařa na mratava puna ne Ntewa.

<sup>22</sup> Kana kuruta war plan kieta kororak napiowaena la naña sike loyumañan ita, kiena wii merarava kevan tasneta imi mekiki nena ga, ana ve temawa re sina, a tekilia teva loyumaña. Tekilia teva lavisin Ntewa naña sineta la ve lelaga, teviawa manene mñarera e naga tesape yoko ve koven lua ita re, yoko naga worworun ita ga.

<sup>23</sup> Tekilia telelaga ruru tevisave yoko Ntewa kila wo ve sanene van ita, komin naña silaga, naga sumña kila nena taveve ya naña naga pisaaria. Ve tesitom ñele re sina, ana touarar ruru yumaena wo navisawalen va yar taña lala sur tanea naña naga kila pan ita.

<sup>24</sup> Ana e ke sina ga e lepas na pun ita, popon tesitom ruruia, telual mrapa na yuren kieta sitomena lala vena sineta si manene ita la sane, a vena tekilakila ruru yumaena wo la van ita va laa sane.

<sup>25</sup> Pe pon re teligan ñelaga na viranar ruru itaen poli, sa naña yar lañas akila ke rui, ana popon teiilaar ita silaga. Pelaga wo la nene, monar tekila lue ga van ita, a visae tevisu pogos mñarera na legiena maro la asike lavisi narui, popon towo lue ga van ita sanene va ña ga.

*Ve tesitom korenan re naliñereena kiena ne Ntewa*

<sup>26</sup> Popon teviun naviunena e lepas na pan ita naña tetol nakiliaen la e visena lelaga rui. Teviunia tesape visae ve tevisuar ruru ita re, sane tesumñalun naña tekila ruru ke mlamulena viowa, yoko ve sanapen ita narui? Navisatameena nena, sanini, mlamulen viowa la ne

sanene, pe kana kuṕaṕaena re si tai naṕa yoko war plan poli.

<sup>27</sup> Ya ga naṕa sike pa rui, nane navisaarena kiena ne Ntewa nalaen nakoḡena m̄arera vanonia, amio pupia lelen kapi naṕa yoko kekan make nena kiena nasinekar lala. Nanene naga pe sur tai naṕa monar temaraun vaṕisi.

<sup>28</sup> E navisaluaena marua kiena ne Mosis nanua sumo, visae yar tai kilaro kana visena ne tai, a visae yar ve lua pona ve telu avisave lelaga kemua, pe mrapa na sineyeena re si poli, yar nene yoko akilalua kiena malena veraga.

<sup>29</sup> Visae akila ve sanene va yar naṕa kilaro navisaluaena kiena ne Mosis, ana yoko ve sanapen yar naṕa pilon ke si m̄asina pa Narina ne Ntewa? Yoko naga kiena nakoḡena ve keviu manene laa na wa, komin naṕa naga ṕarnena kare kuruta naṕa naviranarena viu naṕa kila naga mekik rui e marana ne Ntewa. Yoko Ninuṕa na lemamiena loge viowagan ṕelaga nene vaṕisi, sinen kar li yar naṕa kila na wa.

<sup>30</sup> Yoko monar war nakoḡena nena, komin Ntewa pisaar sanene ṕa rui. Kiena Visena Wa tai sike e Tus na Visaluaena, naṕa pisa sanini, sape

*“Naliṕereen mlamulen viowa, naga kiau in ga taaga.*

*Yoko nelamaran si van la m̄arera na m̄arera vanon kiela naviowaena lala.”* **Nav 32:35**  
A e ke e lele nene na wa, visena taṕena pisa ke m̄ena ga sanini, sape

*“Yoko Ntewa na mava liṕere kiena yeririna lala.”*  
**Nav 32:36**

<sup>31</sup> Monar tevisuar ruruia, komin yar naña kila mlamulen viowa, pogos naña aligan naga e limana ne Ntewa vena visu vevea, nanene na pe narin sur re nene poli, naga pe sur namarauen ke nene narui.

*Viawaena m̃arera navisuen sur naña yoko imi m̃aliv na wa*

<sup>32</sup> Temninue kare narui aña yoko ve sanapen legiena la ne pimi ke ne wa, ana popon tesitoñal luen ga mrapa wo la naña Ntewa miila ita ea, e legiena la naña ãaro pa rui. Nanua pogos na tepim toñaliv e yomerarava, pe piavi re nena poli, tepane pogos m̃arera la pañisi, naña akila piowa manene la pan ita naña temlelaga ke e Yesu.

<sup>33</sup> Pogos la ãasa, e ga e maran yar lala, akoven visena viowa la pan ita, a pogos tañena lañasa, akilapel ita ga e ãelaga viowa la naña piowa na piowa manene la. Pogos lañasa, pe akila re pan ita poli ana akila pa kieta erau tañena lala, ana tepa tesuñal tesu temio la, temiila la.

<sup>34</sup> Ita lañasa, akoven la apa e yuña nakoarena, ana sineta miye la pañisi, tepanon tekilali naña teiila la vena towar plan re kiela pupia naloge viowaen naña apisu e yo nene. A pog tañena si lañasa, la naña sinela kar ita apimin kieta sur lala, añar plan kare petan ita naña tekilalu manene la sur lala. Ana e pogos nene, pe sineta kar la re poli, tetañan ga, komin naña nasinekekaren tai sike e ita, sane sur la naña añar plan pavano lala ape na yomarava ga nini, ana kieta sur nowo la naña apowo manenea

asike ga wa, naña tařatete akovio pog tai, yoko ave kieta lue narui.

<sup>35</sup> Nane kieta pupia naulua itaena nane nanene narui, naña yoko Ntewa la van ita, ana komin naña nalaena tanea nene sike e marata, pe pon re si tekilapal nakiliaaren m̃arera naña sike e ita poli,

<sup>36</sup> ana monar tesuñal ruru nena m̃arera tese Ntewa. Kieta sitomena la monar ve piavi ruruia vena tesuña tekila ga kiena nasinenanena ne lala, ana tekilia tetol sur la naña naga pisaar pan ita.

<sup>37</sup> A pog na tolana, pona ve ve piavi re yo, yoko imi m̃alivin ita, sa naña visena kiena ne Ntewa tai naña navisawalena Ařakuk pisawalia, sape *“Yam ve plas la sina, ve ve piavi manene re, ana yerkawa naña yoko imi ne, naga tařatete si su laa sane, yoko imi m̃alivi nenaga.*

<sup>38</sup> *E pogos nene, kiau yar mesmes lala, yoko amal ruru nenaga, komin naña amlelaga e inu, ana visae nevisu lala yar tai yepen mavin inu, weresu si naga, yoko tařatete nena nekekarania-a řisa.”* *Aña 2:3-4*

<sup>39</sup> Ana pe ita re nene poli. In na pe nesitom re nesape ita yar sur la ne sanene yoko temaraun Ntewa poli. La naña ařeresula sanene, yoko monar ava akovio ga narui, ana ita naviawaen m̃arera ea, monar tetol malena.

## 11

*?Naviawaena naga ya ne?*

<sup>1</sup> Kieta viawaena nena, yoko tevisave naga sur ya na sanene? Tekilia tevisave naga pe řelaga

na wasine ruruen Ntewa m̄arera, naṣa kilia kila kieta sitomena kapuru ruru wo e ga e naga, a kilia kila kieta lelagaena m̄arera, tesape sur la naṣa pe tepisu re poli, ana pe lelaga naṣa asuṣa ga.

<sup>2</sup> Viawaena naga pe pupia sur tai paṣisi e navisuena kiena ne Ntewa. Siar e repita nasumo lala pimi, mrapa taaga nena nanene naṣa Ntewa kila sane kilia kekaran yaru.

<sup>3</sup> Pelaga naviawaena ne nanene narui kila ita tepisu kilale sane pe lelaga kemua, visena kiena ne Ntewa ga sii make suria, kila kieta yomarava nini pimi m̄alivi. Kiena m̄areraena ne nane mla sur la naṣa yar taṣatete visuia, miyuṣaen make sur la naṣa tepisu sike ea.

<sup>4</sup> Popon tesitomyu si repita na sumo laṣasa, sanape naṣa la m̄ena apiawa e Ntewa nakonua.

Ta naṣa naga yermarua Epol. E kiena naviawaena e Ntewa, naga mlotun e nalaena ta naṣa memes paṣisi, ana Ntewa kekarania, naga pisu po manenea taulu nalaena naṣa wenla naṣa Ken sinenan sape lavia. Ana Ken sinen mimi, m̄em̄ar wenla nena, ana ṣelaga wo naviawaena kiena ne Epol e Ntewa kila Ntewa pisu sane naga pe yar memes tai, a suri nene kilia iila ita ke vim tol nagane na wa.

<sup>5</sup> Taṣena sina, nane yermarua Inok. E kiena naviawaena e Ntewa, naga pe tol re marena poli. Naga pe yermarua, ana Ntewa ga pitomi ṣerelua naga, kovio e yomarava nini pa metava, ana akale pano-o pe aṣal re poli. Ntewa kila sanene



pania komin pogos naña sike e yomarava nini, naga pe yar tanea tai naña Ntewa kekaran pañisi.

<sup>6</sup> Lelaga pañisi, visae naviawaen e Ntewa ve su re e ita, tañatete tekila naña yoko Ntewa kekaran ita. Yar a naña sinenan sape kilia Ntewa e kiena malena, sinenan sape imi lavisinia, naga monar viawa manene sanini. Naga monar lelaga sane pe lelaga kemua pañisi, Ntewa sumã ga, a monar wasinea sane yoko Ntewa kila wo vañisi va la naña akale ke naga.

<sup>7</sup> Yermarua si tai naga Noa. E kiena naviawaena e Ntewa, naga kila ya naña pisa pania. Ntewa pisawal pupia womie nene pania, ana pogos naña Noa pe pisu re nena kana kile ta poli wa, ana kila ga ya naña Ntewa pisa pania, kila kiela pupia waa nena vena namratava puna lala akilia amal ea.

Naviawaena kiena ne Noa nene e Ntewa tamalia la nene, kila mña pupia nakoena pimi mñalivin make yar tañena lala e yomarava, komin naña pe amlelaga re poli. Ana Noa naga pe na ãegas kiena ne nalelagaena lala tai e Ntewa, ana Ntewa kila amesmes e marana.

<sup>8</sup> Tañena si tai, naga yermarua Epraam. E kiena viawaena e Ntewa, naga mlogear ruru pañisi, molue petan yo naña sike ea, pa e yo tañena tai, naña Ntewa pisaar sape tamñan vania. Naga mialin ke sape va ea, mninue kare sape amña kope ke na wa, ana komin naña Ntewa pio, naga pa ga narui.

<sup>9</sup> Naga mial mña pano-o, pogos naña pa mñalivi ea, sa ga wolawa ga tai, ana purvanua ke naña Ntewa pisaar pan narui. Ana ãere yumña tapolen

m̃ene yo nena, sike e nene amio na mratava puna lala, sa naña narina lala, naña Aisak lala amio mapina lala naña Sekop lala, naña la m̃ena akus porotano nene naña Ntewa tam̃an pan la ve kiela lue.

<sup>10</sup> Ana Epraam tol yo nene, sike ea, ana pe kila re pupia m̃ana yum̃a ta poli, m̃eke ga e yum̃a tapolen la nañane. Naga nene komin naga kiliar ruru po pañisi sape pe m̃ana um̃a re napo nene poli wa, ana naga sukoko ga e nene na wa, vena yoko va e pupia pulkumali kiena ne Ntewa, naña Ntewa pisirlua a miyum̃aen amio kana ãeren m̃arera naña tañatete si wororowa pogos tai.

<sup>11</sup> Ta sina, naga sira marua Sera. E kiena naviawaena e Ntewa, naga m̃eñenan ãesan narina naña Aisak. Nakonua nena, pe ãarli re sisi poli wa pano-o pimi pe sira marua, ana sum̃al m̃arera sike e naña sape yoko navisaarena kiena ne Ntewa ve lelaga vania amio wona yermarua Epraam, sape yoko lalua awar narila.

<sup>12</sup> Yermarua Epraam m̃ena ga sa naña mrae pito tano rui, ana narina naña ãaria kila namratava puna la apim ape mok pañisi. Ana siraunia aãarliluen la apitom sanene, pano-o kiena lus lala apim ape mok sane verue la metava ma e sinapane, tañatete si aulola, asaga mras nen none la garo losi narui.

<sup>13</sup> Ana yermarua make la naña amlelaga e Ntewa sanene, Ntewa pisaar kiela sur wo lala pan la, ana aãar ga kana narin kinakinas komãasa, ana amar tan yomarava nini. Ana akilia asape Ntewa ãar ligan ga lañasa sike ga wa,

yoko warpo nakeviu sirau, ana kila apisu kilale asape ape wolawa ga e yo nena.

<sup>14</sup> Yomarava nini naga pe kiela yo re nena poli, ana kiela sitomena sike e m̃ala ũña tãpena nãña napo.

<sup>15</sup> Ana visae yo nãña asitom manenea naga purvanua ke nãña amligan apim, visae la sinelania, akilia avilopu la awasũpe si ava e wo ga.

<sup>16</sup> Ana peraga, pe kiela sitomena p̃asũpe re si pa e nanene poli, la asitom ke asape atol yo tãpena nãña po manene la sane, sinelan ga ũña nae ma e peni. Ntewa kila ruru make kiela pulkumali wo nene rui, ana naga sinenan pãpisi sape popon loge avisave naga pe kiela Ntewa kemua lelaga, a nãña avisave m̃ana ũña, naga ve m̃ala ũña lue narui.

<sup>17</sup> Ana e lepas kiena ne yermarua ke la nene na wa, tevisayu si yermarua Epraam, nãña e kiena nakilaliena m̃arera nãña naga pisuia. E kiena naviawaena e Ntewa, naga tãman nena narina taaga nãña Aisak pania, tãman sape kũpãpain ke sina ga vania. Aisak ke nãña nanua ne Ntewa pisaar m̃arera pa arimana, sape

<sup>18</sup> *“E narũña nene, yoko kiũña*

*lus la aim ave moki.”*

*Jen 21:12*

<sup>19</sup> Ana pogos nãña Aisak lavis mare, Epraam pe kiena sitomena re poli e navisaarena kiena ne Ntewa nene, ana naga mlelaga ke nãña sape visae monar wẽmar narina nene mare, Ntewa kilia tamalia si wo ga ne. Ana Ntewa pisu nãña kiena naviawaena pe lelaga sanene, ana Aisak pe mare re si poli, ana ariman pisu ga nãña Ntewa

mła maran si malena kiena ne narina nene pania mligan e limana.

<sup>20</sup> Ana yermarua tařena si tai, naga narina ne Epraam nařa Aisak. E kiena naviawaena e Ntewa, mła kiena visena maro pan narina lua nene Sekop amio Esau, mlelaga mřarera sane yoko sirau navisa ruruena imi van lalua sa ga nařa pisaar pan la.

<sup>21</sup> Ana Sekop mřena nene sanini, e kiena naviawaena e Ntewa, řasine ga naga sane yoko kila wo van kiena lus lelein la nařa avim sirau. Naga řar narina nařa Yosop, ana Yosop řar narina la lua. Ana pogos tai, lavis repila marua nařa Yosop kovio, sumřalun kiena plasgai telan řarina pito tano vena lotun Ntewa, řisi na pisawal navisaarena navisa ruruena pan mapina la punu ga.

<sup>22</sup> Arimala marua nene Yosop, naga mřena popon sa tesitořalia. E kiena naviawaena e Ntewa, naga mlelaga mřarera sape Ntewa ve ligan re yeririna nae Israel la asulue Isip, ana yoko wereplan la awasuře si e kiela purvanua wawa. Naga pisawal sanene, ana pogos nařa kiena malena lavis řisi, pisa mřena sape visae naga mare, ve asin re mon Isip, monar akus vano-o asin mřene kiela yo.

<sup>23</sup> Tařena sina naga yermarua Mosis, kiena yermarua lua. E kiela naviawaena e Ntewa, pe amaraun re navisaluaena mřarera kiena ne řarin Suře Pero poli, pogos nařa narila nane Mosis paeme, apinaia naga pařisi, pe atařan re

añeñar poli, ana akuswan naga mon moña ga, pano-o tol kupario telu.

<sup>24</sup> Ana Mosis nene, naga mēna, pogos naña kapuru pa keviu pae na, naga mēna pe yar na lelagaena. E kiena naviawaena e Ntewa, pe sitom manene re e kia wo naña amla pania, sa naña Parin Suñe Pero narina naña sira, narina,

<sup>25</sup> ana naga sitom manene la kiena lus tañena lala, yeririna na mratava kiena ne Ntewa. Naga mligan umā mñana yar keviu, amio ñelaga la na yomarava nini, naña sane kana kekarena pe na ñane ga ne, ñisi na pa miakol amio kiena yeririna lala e malena na pog mñarera la naña le Isip la akila ke pan la.

<sup>26</sup> E pogos nene, naga sumā sitom veve ke ga navisaruruena la naña kilia imi mñalivin naga e pogos la naña pimi sirau. Naga mnunun sape visae kus ke naloge viowaena amio la vanon yumāena kiena ne Navisaarena, naga po manene la taulu naña naga kus ke sur wo lala na malena memee ga e umā mñana ne yar keviu nae Isip.

<sup>27</sup> E kiena naviawaena e Ntewa, pe maraun re sur ya naña Parin Suñe Pero kilia kila vania, ana naga mligan ga Isip sa naña Ntewa pisa pania. Naga pe pisu re marana ne Ntewa poli, ana ñar yon ga naña logearia sa ga naña pisu nena e kilamarana.

<sup>28</sup> Naga ke sina ga, e kiena naviawaena e Ntewa, naga ñuarar ruru mrapa natamaliaena naña Ntewa pisa pania, a naga kila kiena yeririna lala aplan ke kuruta na sipsip e mñala pulutava lala, ana pogos naña Ntewa mligan

kiena navisi na marena pitomi vena la nakoena va Pero, war ro ga kom metavan m̃ala ũña lala, pa m̃emar m̃earu na ũña punu ga nae Isip.

<sup>29</sup> Ana siraun nanene, yeririna nae Israel la nene aṗure matan Pero, amial apa atol Sive naṗa Pivaga. E kiela naviawaena e Ntewa, akusro pupia sive nene apa lepas ṗasia, amial ke apano-o sa ga amial ke ga e porotano. Ana la nae Isip asirau apimin la, ana la m̃ena amial asape akusro sa ke ga, ana pupia sive nene pimi pranwo la sina, kila talilun make la ga amarmare.

<sup>30</sup> Ana pogos naṗa yeririna nae Israel lala amial apa la sane apa atol pupia kumali naṗa Seriko, amio kiena li na mara la naṗa asike loyuñã e kana pupia kove naṗa amiyuñãen e kilavaru telivi piora. E kiela naviawaena e Ntewa, la nae Israel amial atalivi e kumali nene pano tol legiena orai, pano-o tol legiena na olua, apisu naṗa Ntewa kila kove la nene amloloru veraga.

<sup>31</sup> Ana loyuñã e kumali nene, sira tai suñã ga, naṗa nanua sumo pe sira na mrapa, kiena kia Reap. Sumon, yar la lua navisu veveen yo kiena ne le Israel lala, la apa atapolou loyuñã Seriko, ana pogos naṗa asike ea, sira nene ṗerewan la e m̃ana yuñã, miila la keviu paṗisi. Yaru taṗena la nae kiena yo, pe sinelan re avatanon Ntewa poli, ana e pogos na mara, amarmare, ana e kiena naviawaena e Ntewa, Reap pe mare re poli, atamalia kiena malena.

<sup>32</sup> Nane repita marua la ṗasia naṗa ape purṗes nen yar naviawaena nakonua. Ana tekilia teva

laa sane, vanon kia moki sike ga wa, sane yermarua la nene Kition, Parak, Samsen, Septa, amio Parin Suþe Tepet, amio mēna Samiuel amio navisawalena taþena lala, ana nepisu sane torok ga wa, pe aora torokin re poli naþa nekilia nesiri plan kiela suniena la veve taaga e la punu ga.

<sup>33</sup> Pe lelaga kemua, visae teloge ga sunena la nene na, apo na apo. E kiela naviawaena e Ntewa, kietā yermarua lala akila pupia sur la moki. Yoko tevisu naþa akila mara ataulu purvanua mārera taþena lala, ana akila naþa yeririna na yo viowa lala monar ayumāe ataveve navisaluaena na po, ana aņareran na tolen ya naþa akilia asape Ntewa pisaar pan la. Yeririna taþena lala akuwanla apito e þiliþili na laion vena akan la, ana pe akan la re poli.

<sup>34</sup> Akuan la e pupia kapi, ana taþatete nena kekan la. Pogos laþasia apane playu na mara, ana aþure matan poga ga, a pogos laþasia li na mara la akila kare la mña pano-o pe puriula mārera re si poli, lavis ga þisi. Ana siraunia, apisu ga naþa apa sina metava, aņarera manene paþisi, akila mara amio kiela li na mara na purvanua taþena la nene, pano-o ataulu la, aņene plan la aþasuþe sina.

<sup>35</sup> Lala þas amarmare e pog mārera la nene, ana ola la atagin la, ana amilan ga Ntewa mla si ninula pan la sina, pisir plan la amal sina.

La sina þasia, nasinekar la akila yepe lalae moki pan la, a akilali la visae la avisave la pe amlelaga re si e Ntewa poli, yoko aligan la awasuþe la sina. A visae avisave asumña amlelaga

ke ga e Yesu wa, yoko akila m̃arera la sane van la na wa.

Ana e pogos nene, yeririna lala kiena ne Ntewa asape visae akila m̃arera la ve sanene van la, poga ga, ana taṗatete aligan kiela Suṗe. Asitoṃal ga asape e pogos naṗa visae naga visirplan la sina, la sinelan suṃalen se marana naṗa akekara, a ve amawan re sina.

<sup>36</sup> Lala ṗasia apiar la, aṗure la apa aṃe la e yometava e maran yar la naṗa apisa kare la ke paṗisi. La ṗasia, pogos naṗa apiar la, nane e sen urmi lala, akuan la ṗararia e yuṃa na koaena.

<sup>37</sup> Lala ṗas sina ga, akove moṃar la, la ṗas apiliro la komṗas lua e sowa, ṗasia ateṃar la e playu na mara lala. La naṗa visae ve amare re, la ṃena ga sur m̃arera van la pa ṗisi. Pe kiela sur re poli, limala plas paṗisi, ṗisi na asi plan ga kulus nen nane pona sipsip vena ayenia nakilaen yepela visusun. Sur la punu ga piowa lue ga pan la, a yar taṗena lala pe apisuar la re nena ga, akila kare la keviu ṗisa.

<sup>38</sup> Pe ṃala uṃa re poli, a pe kiela yo re naṗa ava e poli, ṗisi na asuṃa amialialoro kar ga e yo mema a metava e tavie lala, asu kar ga e pulṗe lala.

Nane yar na viawaena lala na sa nene. Yomarava nini na piowa manene la pan la, sa naṗa tekilia tevisa tesape yomarava nini pe torokin re si yeririna wo la na sanene ase poli, yar la na sanene popon asuṃa ga ṃala uṃa metava ma e peni.

<sup>39</sup> Tepisu sane la punu ga naṗa tepisayu la pa rui, apane pog m̃arera la mok paṗisi, ana pe



amlor re poli, asuñal ñarera ga, kila temnunu kilale kiela naviawaena e Ntewa keviu, a pe lelaga. Ana la ape na pog nane naviranarena marua nanua sumo, ana asuñña amloge navisaarena wo lala kiena ne Ntewa, sane yoko naga kila mrapa naña akilia atol malena naña ve uro re, ana pe apisu re mras navisaarena nene molue pula poli.

<sup>40</sup> Ana Ntewa pisuveve sape popon kila mrapa viu tai van ita. Ana pitetalia Yesu pitom kila pae kiena yuññaena, kila sane la nanua sumo ne, amio ita, ita punu ga towar mras na visaarena kiena ne Ntewa nene e mrapa ve taaga ga, a e pogos taaga ga.

## 12

*Kilamarata suñña ga e Yesu, naña naga ñarera manene pano taulu pogos ñarera lala*

<sup>1</sup> A la punu naña tepisayu la ñaro rui, la na sane ape pupia purpēs nen viawaena lala, asa ga pupia pēgas nena naña asuñal asuñña apisuveve ita ke ne, asuñña apisu ruru ke kieta viawaena, asape yoko tekirir va ve sanape. Sur ya naña suwo ke kieta mrapa, monar teyaslua, a mlamulen viowa la naña suñña piar kare ita ke ne, monar towarplania, ana toñareran kiririen e mrapa piavi naña sike e marata, naña sitomiena na liganena ve su re si e ita, kieta sitomen la ve piayavi ga.

<sup>2</sup> Tekira tevisuar manene Yesu, naña suñal sike e luas nen mrapa gare. Naga pe purpēs nen mrapa na viawaena, a pe kana luas ñena ga,

ana pogos naña tesitomñalia, yoko la ñareraena van ita. Tekilia tesitomyu si pogos naña naga ãar ke yepe lalaea a naloge viowaena meta e lak torovia, naga sitom korenan ga pogos ñarera naña naga panea. Naga mligan kiena sitomena ñarera su ga e pupia kekarena naña sike e marana, kila ña pano-o tauluia, ana nanagane teke e lepasnena ne Ntewa na ãamarua, e pupia lelenu wa ma e peni.

<sup>3</sup> Popon tesitomyu ña Yesu, e pogos naña yeririna viowa la nene akuan make visen viowa la pania, sinela kar manene pañisi, ana naga tañan ga naga pano tol luas. Sanene, ita ñena popon ve sineta maren re yumñena vilaga, a tañatete temarau, ve tesitom re urmatanen ya naña monar tekila.

<sup>4</sup> Pona tesitom ke tesape temloge piowagan kilaen mara temio ãelaga viowa ana torok yo narui, sineta mare, ana pe tetol re ya naña Yesu kila poli wa, pe tesu wo li re mlamulen viowa poli wa, pano-o kata kuruta mlau e yepeta.

<sup>5</sup> A popon ve sineta ãesan re visena na iilaren naña Arimata Ntewa pisa pan ita, sape pio ita sane narina lala, sape

*“Naruu, visae nevisu popon sane naloge viowaena tai imi tol ko, ve ositom korenan re, pona visae yam lañasa nevisu sane monar nela nakoena van ko, kiomña sitomena ve lor re, komin kiau ãelaga navian koena naga sanene.*

<sup>6</sup> *Visae la naña sineu sii la, yam lañasa monar nekila aloge viowa,*

*a la naña nepe Arimala, yam lañasa monar  
nowela.” Pakaiwa 3:11-12*

<sup>7</sup> Sanene, visae pog tai ovisu sane ve sanene van ko, monar om̃arera, otañan ga sane mrapa ke tai naña Ntewa sinenan sape vian ko e narui, sinenan sape kila ruru kioñã malena ne. Ita punu naña tepe ata, tesuñã tekila ke sanene pa narita lala, ana visae Ntewa pisu ita sane narina lala, naga monar kila m̃ena ve sa ke nene van ita.

<sup>8</sup> Sur nene naga yoko ita make tetolia, a visae ve kila re van ita tai, naga pisu yaru nena sane pe pe narin ruru re napo poli, naga pe narin yar nae ga koyo tai.

<sup>9</sup> A nanua sumo, ita make ga, pogos naña arimata la amla ke nakoena pan ita, pe sinetan re poli, ana pe lelaga, nenaga ne tepisu kilale sane amesmes ga, a kila sane tesitom la va la sane. Ve sanene na, popon manene tevatanon Arimata e ninuta, tekekaran ya naña kila pimi m̃alivin ita, vanon naga ke nene narui pe mrapa na malena.

<sup>10</sup> Arimata lala amla ke nakoena pan ita e kas la naña tepe sisi ke ga wa, akila sanene komin asitom asape yoko wo la sane van la ke sina ga, ana pogos naña Ntewa mla nakoena pan ita, kila vena yoko wo ke sina ga van ita, vena ita m̃ena ga tekilia tetol kiena malena wa.

<sup>11</sup> Nakoena pe sur tai naña e ke e kana pog na kusena, pe kiki re nena ga, melkalka pañisi. Ana siraunia, visae tetam̃an naga vian ruru kieta malena, yoko war mras napo lala, sane ãelaga na

moñauena a suñarena, amio ðelaga na waena a na mesmesuena.

<sup>12</sup> Ve sanene, visae sur ya naña avitaweia, amiu akilali sane navisawaliena Aisea pisa sumo, naña sape

*“Avisir plan limamiu la naña tayoi sike ne, akila la akulul sina, a purpur na lamiu la naña miyuyuwawa ke ne, akila la añarera sina.”*

*Ais 35:3*

<sup>13</sup> Sanene, amiu mēna ga akila ruru si kiamiu mrapa la amesmes ruru wo, ana kiamiu laulu la naña ayaloro atavevea, yoko lala ve viowa manene re la sane, ana yoko imi mārera sina.

*Avisuar ruruia ve akila pal re mrapa*

<sup>14</sup> Sur lua na waryoen silaga la sanini. Tai, naga ðelaga na ve erau woena amio yeririna tañena lala, a ta sina, naga ðelaga na malena wa naña yaru monar se ea visae sinenan sape visu marana ne Ntewa na mava.

<sup>15</sup> Ana monar ayuñae mārera vena ve amiu yar tai naña kirir ña pano-o ðisi ga e mrapa komsusia, naña pe tol re lemamiēna kiena ne Ntewa poli wa. Ovisuar ruru mēna ga naña ve narin ðeligas melkalka ve imi tawa re e sinemña. Visae pere, ðisi na kapuru war mras la ve moki naña piowa e kioñā malena, a kana kororak ne la ve kila kare re malena wa kiena ne li na lelagaena wa tañena lala.

<sup>16</sup> Monar ðelaga viowa na yermēne amio sira ve imi re e amiu, a monar ve ðelaga nasineþesan ruruen re Ntewa, sa naña Esau kila nanua sumo. Esau nene, Ntewa kilologia naga pe mēaru kiena ne arimana vena kilia war lalimana ve kiena,

ana pogos tai naþa visokaria, mlopon ponos nen pursi wo naþa wenla na vetokaki Sekop miyuñaenia, ana mias lua sitomiena kiena ne Ntewa e kiena malena, pisa pa wenla, pisape “Ei, ola pursi nene im van inu nagane, a lalimana ne ata make ga naþa pe kiau, ana nela vaniko.”

<sup>17</sup> Ana sa naþa tekilia þa rui, siraunia Esau pisa sape yoko war maran si lalimana ne arimana ve kiena, ana apisalupar ga, vanon naga þiliwilin plan rui. Ana mloge piowagania, tagi pano-o kila þele ga rui. Naga sitom ke sina ga, sape sa ve kila re ga, ana nagane kilalu rui.

*Tavie naþa Sinae na yomarava, amio tavie naþa Saeon nae peni*

<sup>18</sup> Ana popon tesitomli si ve tokak ga e lepas nen navisaluaena na sumo wa, amio lologena wo kiena ne Yesu Kristo naþa pimi ga na wa. Sur lalua nene pe taþena paþisi, ana sur nene tekilia tevisu kilale e kala tavie la lua.

Tavie na navisaluaena marua, nane Tavie Sinae, naþa na yomarava ga nini. Kieta li marua le Yu lala akilia apisu e kilamarala, ana apisu sane pe pupia yo wa na marauena, naþa kap mēke ea a kana pulþalu ne lala yo malolo ga rui, amio kan yaku nena naþa yemalolo kalo make ga, a lagi tai miyui lue ga ea.

<sup>19</sup> Ana pupia kana kumasua nena miyelyelu mñalia, ana amloge pulgo tai pis naþa urmi paþisi, kila sane amarau pano-o, atag asape ve visa re si sur tai van la.

<sup>20</sup> Apisu sane yo nene pe wa paþisi, akranwo ruru nena, sane visae sur mal ya naþa waro

lavisin tavie nene, kus pal laea, yoko monar akovemãaria.

<sup>21</sup> Ana yermarua Mosis pisu sur la nene, naga m̃ena marau, pisape “Lelaga nañane, nemiyuwawan ga marena.”

<sup>22</sup> Naga nene tavie wa na navisaluaena marua na sumo, ana nanagane na pe tepa re si e poli, tepim e tavie wa viu na lologena wo nene na Tavie Saion. Naga sike ma e peni, naña pulkumali kiena ne Ntewa mali m̃eke ea, naga pe Yerusalem viu ne nae yo mava. Naga pulen ga navisi lala, mok na mok naña sane apulopule ga, naña asuvileviles kar ga vena kilaen yauena na kekarena.

<sup>23</sup> Ana likan la, ita p̃egas na li na lelagaena wa la tesike lele taaga ea, naña ita tepe sane m̃earu lala kiena ne Ntewa naña teñar lalimana. A amio ita m̃ena, ninuna ne kieta yar mare lala asike ea, nane la naña amesmes ruru pa rui e yomarava, ana pogos naña amare, añure plan la apa atol luasnen mrapa natamaliaena, naña apa asu ruru e yo nene. A yaru naliñereena m̃ena tai totano teke metava e yo nene, naga pe Ntewa na sur make ga.

<sup>24</sup> A amio sur wo tañena la naña asike e kieta kunus wa nalologena wo nene, tekilia tevisu Yesu, amio kana kuruta naña mlau, naña apeven pa e losineta lala vena kila temekiki. Kana kuruta nena, pe sa re kuruta kana ne yermarua Epol nanua poli, naña asape kuruta na ween yaru, a kuruta na kilamaranen napiowaena, ana kana ne Yesu naga pe kuruta na tamaliaena yaru, a pe kuruta na viewoena. Yesu kila po pañisi wa,

naña suñal su likan Ntewa amio yaru, kila kiela naviranarena viu lalua suñalu ruruia, vena kila lalua ave erau wo sina.

*Ayagogon ruru pulgona ne Ntewa*

<sup>25</sup> Navisaluaena marua, naga sane visena na kilañegeena ta naña paeme e yomarava nini, a lologena wo, naga sane visena na kilañegeena ta naña pitom ma e peni. Ana la naña apilon ñasila pan navisaluaena marua nene, tañatete nena aurmatan nakoena ñisa, ana visae ve sanene, yoko ve sanapen la naña apilon ñasila pan lologena wo? Yoko tañatete nena aur matan ve tokaki. Visae ve sanene, popon teyagogon ruru pulgona ne Ntewa, telogearia.

<sup>26</sup> E pogos naña Ntewa pis pa yermarua nasumo la nene, kiena visena urmi pañisi kila yemninu, ana siraunia, kiena visaaren tai pisa si mon metavana, sape

*“Yoko yam si tai nokululun make yo punu ga, ve yomarava re ga nini, a amio make yo la ne ma metava yam veraga.” Akai 2:6*

<sup>27</sup> Visena naña pisa e nini, naña sape “Yam si tai,” naga pisa ke sur keviu ta ne. Naga kana kinasa sape Ntewa kululun yo yam tai rui, ana kiena sitomena ñarera sike ga wa sape kululun li si yam tai ana visu ruru li make ga suria. E legiena maro yoko kululun wowa yomarava nini, amio sur make naña naga sii la sike ea, ana yoko sur naña tañatete kululun rovia yoko suñal ñarera sulue na sike ne.

<sup>28</sup> Sur ga tai naga kilia su lue na sike ne sanini, nane nasuñenena kiena ne kieta Ntewa nena, a

potena paḥisi naḥa mligan kieta malena su ruru sike loyuma ea. Popon silaga tekila lotena wo tai vania naḥa kilia kekarania, tepisu kilale naḥa naga pe na wa paḥisi, tewatanonia.

<sup>29</sup> Komin kieta Ntewa naga kapi ke nene narui, naḥa kilia sikap van make sur punu ga.

## 13

### *Pelaga la naḥa Ntewa kekarania*

<sup>1</sup> Visen si laḥas nini vena iila amiuena, naga sanini. Popon asumna akekarani amiu lue ga, sa naḥa kam na ape mratava taaga ga amio Kristo.

<sup>2</sup> Ana ve akekarani amiu re ga, akekarani ke mēna wolawa lala, akekarani naḥa avisuar la e mamiu uma lala. Popon akilakila sanene, komin pog laḥasa, kam na aminue ga, ana wolawa la naḥa apisuar la ke ne, la na navisi kiena ne Ntewa ke la narui.

<sup>3</sup> Asitomāl la naḥa asike e yuma nakoena, awar pae kiela naloge viowaena lala, sa ga naḥa akoven amiu mēna apa asike amio la. Kam na ve sinemiu ḥesan re mēna la naḥa yar taḥena la asumna akilakila kare la ke silaga, komin ita punu ga tesike e yomarava nini, a monar tokus pae pogos mārera la naḥa yoko tevisuia.

<sup>4</sup> Popon yar make ga avisu kilale ḥelaga na talopaena naga pe sur wo a pe sur wa mēna ga, a komin sur ne nanene, pe pon re si kororak tai imi kila kare tog naḥa aḥaenia pe mēla lalua naḥa atalopa, komin lalua apisaaria asape yoko ve aure re si taḥena. Yoko Ntewa la na liḥereena



va la naña amiyalyal kar ga, sane li na talopaena naña akila kolau, pona yar viu la naña akila lau.

<sup>5</sup> Ovisuar ruruia naña ve oligan re kilavaru imi ve suri na sumo e kioña malena. Popon okila ko okekaran ga narin ya naña teke e lumoña rui, komin navisaarena kiena ne Ntewa naña sike pa rui, pisa sanini, sape

*“Tařatete neligan ko yam tai, tařatete nevilon  
mãsuu van ko.”* *Lev 31:6*

<sup>6</sup> Ana pogos naña tesitomyu si naga nene, mla si nañareraena pan ita, vena tevisawal visena naña sike e Tus na Yauena lala, pimi pe kieta visena, naña tevisave

*“Yar na iila ruru inena, naga Ntewa na mava ga,  
ana ve nemarau re si narui, yoko yar tařena  
kilia kila si ya ne viowa van inu ne?”*  
*Yauena 118:6*

<sup>7</sup> Sur tařena, popon asitomãalar mña kiamiu nasumonena lala, naña apisawal řesan visena kiena ne Ntewa pan amiu. Avisu veve ruru mras naña molue kome řelaga wo na kiela malena, a akila ga nono na kiela lelagaena mñarera e kiamiu malena lala.

<sup>8</sup> La amlelaga ruru po, ana ita mña tekilia telelaga, komin Suře Yesu Kristo naga piloulou re pogos tai poli, naga maran taaga sa ke nakoneva, řane, a peni, sulue na sike ne.

<sup>9</sup> Popon tevisa mña tevisave avisuar ruru amiun visena kar tařena lala amio navian wowenen lala ve aim aure plan amiu re vetan kove wo naña kam na asike pae rui. Yar lařasa asitom manene la e řařagena wa lala, amio kala kinanena ne lala, ana kinanena la nene

taṭatete nena iila kiela malena lala. Sur taaga ga naṣa kilia kila sineta la m̄arera ruruia, nane lemamiēna kiena ne Ntewa pimi pan ita.

<sup>10</sup> Kinanen la ne tai ne sanene, naga nane kilam̄iu na kuṣaṣaena lala naṣa yaru wa la akuan ke e wonta. Amlenwoia, akila pa yum̄aena la e narui, ana siraunia akania sa naṣa akinaṅ kala ke narui. Yar wa la nene la amal ga e kinanena na wonta la nene, ana ita naṣa temlelaga e Yesu, ita na pe tekinan re e wonta nene poli, ita na kata wonta taṣena m̄eke na, naṣa temal e kana kuṣaṣaena nena naṣa akuan su ea, naṣa yar wa la pe apisu kilale re poli, a la taṭatete akinana ea.

<sup>11</sup> La asuṃa akila ke kiela kuṣaṣaena la nene, ana tai na pe taṣena towe laa sane, sa naṣa asape kila totou na marena kiena ne Yesu, kuṣaṣaena nena naga naṣa asape na lakorenanena na viewoen mlamulen viowa, ana pogos naṣa ṣarin yar wa kila naga, naga pe kus make re tas nen sur mal pa loyumuṃa naṣa pe yo wa manene poli, ana ṣar ga kana kuruta, pa mligan se wonta. Ana tas nen sur mal nena, akuslua si petan uṃa, akus pa vanua, ana askapia.

<sup>12</sup> Naga sa nenaga naṣa Yesu kila, naṣa akus m̄ena naga pa vanua e purkove na pulkumali, akila mloge m̄a piowa pano-o kana kuruta mlau make nenaga, naṣa pe mlau koren re poli, ana mlaun naṣa kila ita kiena yeririna lala tepim tepe yar wa ruru nena napo lala e marana ne Ntewa.

<sup>13</sup> Ana komin naṣa Yesu kekaran sape kila ve sa nene vanon ita, ita m̄ena ga monar tekekaran

teva tesuñal tesu temio naga vanua e uña, yar la avisu kare ita sa naña apisu kare naga, tokus naloge viowaena ve sa ke ga naña naga kusa.

<sup>14</sup> Visae viowa ga van ita e yomarava nini sanene, sanene na pogaga ne, komin naña pe tesitom re tesape yoko tesike e pulkumali tai e nini ana tesulue poli, ana temligan kieta sitomena sike ga e mñata uña napo e pulkumali viu naña tepanon ke rui.

<sup>15</sup> Popon kemua tesitomñal lue ga naña Yesu kila po manene la pan ita, naga pietavan ita e mrapa rui ana silaga tekilia tevisa potena va Ntewa vanonia. Ve tekila re kuñañaena e sur mal la vania, ana nalaena tai toña ga naña tekilia tela luen ga van silaga, naña yoko kekaran vañisi, naga nalaena na yeluarena. Tesuña tepisirlua ke kiena kia sanene, ana visena na gota ne lala sa ga mralak tai naña kiki ruru nena po pania.

<sup>16</sup> Visae sanene, ve sineta ñesan re naña tekila yuññaena wo lala, komin naga sane kuñañaena naña tekilia tela va Ntewa. Tai naña naga kekaran manene la sane, naga sanini, sape tekila luen ga wo va yar tañaena lala, tekekaran ga naña teviovion kieta sur la temio la.

<sup>17</sup> Sur si lañasa, sane monar telogear kieta nasumonena lala, monar tekekaran ga naña tesu vatanon kiela visena lala. La añion ke pañisi naña avisuar ruru ita, komin naña pupia yerkawa kerkeviu la naña asu metavan la asuña apisu veve ke kiela yuññaena a kiela ñelaga mñaena lala. Visae kieta nasumonena lala, kiela sitomena la marmare, ana yoko yuññaen make

ga va viowa nenaga, ana visae telogear ruru la wo, yoko kila yuṁaena ve urmi manene re van la, akekarania, ana yoko wo manene ṁena van ita, yar na yuṁaena lala.

<sup>18</sup> Pogaga, lavis ke visena make la p̄isp̄is narui, ana sinemimin mesape meviun ṁena tan amiu mesape asitoṁal imimi e kiamiu leniena lala, vanon yoṁarera naṁa mesike e nanagane. Pe mepisu re sur tai piowa teke e imimi poli, kiamimi sitomena la merarava ruru ga, a mesuṁa mesuṁalu ṁarera lue ga mesike e p̄elaga wo la naṁa mesmesu e maran yar lala.

<sup>19</sup> Ana sineun nesape visena la nene akila ruru vilaga, vena nekilia neviaṁa e nini ve ve piavi re nowasuṁe si neim̄as pun amiu.

<sup>20</sup> In na nesuṁa nemlen wo amiu ke ṁena ga, nesape yoko Ntewa iila amiu. Naga pe Ntewa na suṁare, naga pe Ntewa naṁa sinena miye ita kiena sipsip lala, ana pitetalia kieta Suṁe Yesu pitom e yomarava nini, pitom pe yerkawa na visuaren kieta sipsip lala, kana kuruta mlau vena visirluaen naviranarena viu naṁa yoko sike sike nena. Naga pe Ntewa ṁena naṁa Yesu taṁan kiena malena pania, ana naga p̄erelua petan marena, pisirlua malia sina,

<sup>21</sup> ana noṁasine naga nesape yoko la sur nowo make ga naṁa kam na sinemiun ke nanagane vena kilaen kiena yuṁaena e yomarava nini sa naṁa sinenania. Naga suṁa miyuṁae ke e kieta malena la pe ve taaga, komin Yesu Kristo suṁa miyuṁaen ke kieta p̄elaga wo vim ve sa naṁa naga sinenania, ana yoko teieluar manene naga

vanon vano-o tařatete řisi, Sanene.

<sup>22</sup> Na mratava pun inu lala e Kristo, nesiri řaki nini piřasu pan amiu, pona visae ve ve piavi manene re yo, ana visae avisu ve sanape kam na ve sinemiu karin re, ana kam na ala kiau visena na iilaen la nařa sike ea.

<sup>23</sup> Sineun nesape nevisawal van amiu aloge kieta wolai nařa Timote, amligan lua si naga molue petan yuřa nakoarena rui. Visae ve ve piavi re imi kom e nini, yoko imimi lua, meiřas mevisuveve amiu.

<sup>24</sup> Sinemimin mesape avisawal va kiamiu nasumonena lala, amio řena yeririna tařena lala kiena ne Ntewa, avisave mepiun ke mesape la asike sanape, asururuga pona sanape? A le İtalia la nařa asike e nini la řena sinelan asape avisa pokolemalo van amiu.

<sup>25</sup> Kiau visena maro nae e nini, nane nesiri van amiu narui, nesape yoko lemamiena wo a sinewo kiena ne Ntewa sike amio amiu make ga.

**Lologena Wo Kienane Yesu Kristo Kome  
Kewo  
The New Testament in the Lewo Language of Epi  
Island, Vanuatu  
Le Nouveau Testament en Lewo langue de l'île d'Épi  
au Vanuatu — Niutestamen long Lewo lanwis, blong  
Epi Aelan, Vanuatu**

copyright © 2016 Wycliffe Bible Translators, Inc.

Language: Lewo

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 18 Apr 2025 from source files dated 31 Aug 2023

ee028e1c-7e53-571d-8041-681daaf580e8